


柳田文庫
文庫11
D 292
66



文庫11
D292
66

御田泉文庫

010190562340

宋史卷二百四十六

列傳第五

皇明朝列大夫國子監祭酒臣方從哲

開府儀同三司柱國錄軍國重事前中書右丞相監脩國史領經筵事都總裁脫脫等修
承德郎右春坊右中允管國子監書學正黃汝良等奉

勅重校刊

宗室三

吳王顥 益王頲 吳王佖

燕王悞 楚王似 獻愍太子茂

鄆王楷 肅王樞 景王杞

濟王栩 徐王棣 沂王禔

萬曆二十七年刊



和王栻

信王榛

太子謙

弟訓

元懿太子專

信王璩

莊文太子愔

魏王愷

景獻太子詢

鎮王懿

英宗四子長神宗次吳榮王顥次潤王顏次益端獻王
顏皆宣仁聖烈高皇后出也顏早亡徽宗賜名追封

吳榮王顥字仲明初名仲紕自右內率府副率為邠州
防禦使封安樂郡公轉明州觀察使進祁國公治平元
年加檢校太傅保寧軍節度使同中書門下平章事封
東陽郡王三年出閣神宗立進封昌王官制行冊拜司
空徙王雍哲宗嗣位加太保換成德橫海二

王賜贊拜不名五日一調禁中帝致恭如家人禮神宗

耐廟拜太傅移鎮京兆鳳翔自熙寧以來顥屢請居外
章上輒卻至元祐初乃賜咸宜坊第一區榜曰親賢與
弟顏對邸車駕偕三宮臨幸留宴終日拜太尉諸子皆
命賜官制曰先皇帝篤兄弟之好以恩勝義不許二叔
出居于外蓋武王待周公之意太皇太后嚴朝廷之禮
以義制恩始從其請出就外宅得孔子遠其子之意二
聖不同同歸于道皆可以為萬世法朕承侍兩宮按行
新第顧瞻懷思潸然出涕昔漢明帝問東平在王家何
以為樂王言為善最樂帝大其言因送列侯印十九枚

諸子五歲以上悉佩之著之簡策天下不以爲私今王諸子性于忠孝漸于禮義自勝衣以上頽然皆有成人之風朕甚嘉之其各進一官以助其爲善之樂尚勉之哉母桑父祖以爲邦家光徙封徐王詔書不名宣仁有疾顙旦旦入問因亦被病宣仁祔廟拜太師徙王冀賜入朝不趨改淮南荆南節度使徙封楚王病益篤帝親挾醫視診令晝夜具起居狀聞小愈則喜旣而薨年四十七帝卽臨哭輟朝五日成服苑中贈尚書令兼中書令揚荆冀三州牧燕王諡曰榮陪葬永厚陵徽宗卽位改封吳王顙天資穎異尤嗜學始就外傳每一經終卽

遺謙讀官以器幣服馬工飛白善射好圖書博求善本

神宗嘉其志尚每得異書亟馳使以示嘗賜方團玉帶俾服而朝顙辭乃爲製玉魚以別之是後親王遂踵爲故實初居英宗喪丐解官終制以厭於至尊不克遂服慈聖光獻太后之服易月當除顙曰身爲孫而情文缺然若是可乎請如心喪禮須上禫除卽吉詔可子孝騫嗣終寧國軍節度使晉康郡王孝錫終嘉州團練使贈永國公

益端獻王顙初名仲格封大寧郡公進鄆國公樂安郡王嘉王所歷官賜略與兄顙同更武勝山南西保信保

有突武信軍節度使和義郡王

燕王僖帝第十子越王僖帝第十二子母曰林婕妤僖
初授定武軍節度使檢校大尉封成國公僖初授武成
軍節度使檢校太尉祁國公哲宗朝俱加開府儀同三
司封咸寧郡王僖加開府儀同三司封永寧郡王是後
累換節鉞歷任尹牧僖進封萃王僖封睦王徽宗朝俱
歷太保太傅僖進封衛王魏王燕王僖進封定王鄧王
越王靖康元年同遷太師僖授河東劍南四川節度使
成都牧僖授永興成德軍節度使雍州真定牧二年上
皇幸青城父老邀之不及道遇二王哭曰願與王俱死

徐秉哲捕爲首者戮之益兵衛送二王于金營北行至
慶源境上僖乏食薨僖至韓州而薨紹興初有崔紹祖
者至壽春府稱越王次子受上皇蠟詔爲天下兵馬太
元帥與師恢復鎮撫使趙霖以聞召赴行在事敗送臺
獄伏罪斬于越州市

楚榮憲王似帝第十三子初爲集慶軍節度使和國公
進普寧郡王元符元年出閣封簡王似於哲宗爲母弟
哲宗崩皇太后議所立宰相章惇以似對后曰均是神
宗子何必然乃立端王徽宗定位加司徒改鎮武昌武
成徙封蔡拜太保移鎮保平鎮安又改鳳翔雄武以王

府史語言指斥送大理寺驗治似上表待罪左司諫江公望上疏以爲親隙不可開開則言可離貳疑迹不可顯顯則事難磨滅陛下之得天下也章惇嘗持異議已有隙迹矣蔡王出於無心年尚幼小未達禍亂之萌恬不以爲恤陛下一切包容已開之隙復塗已顯之迹復泯矣恩意渥縟懽然不失兄弟之情若以曖昧無根之語加諸至親骨肉之間則有魏文相煎太急之譏而忘大舜親愛之道豈治世之美事邪臣願陛下密詔有司凡無根之言勿形案牘倘有瑕可指一入胸次則終身不忘迹不可泯隙不可塗則骨肉離矣一有浸淫旁及

蔡王之語不識陛下將何以處之陛下何顏見神考於太廟乎疏入公望罷知淮陽軍徽宗雖出公望然頗思其言止治其左右崇寧中徙鎮荆南武寧崇寧五年薨贈太師尚書令兼中書令冀州牧韓王改封楚王諡榮憲子有恭定國軍節度使永寧郡王

哲宗一子獻愍太子茂昭懷劉皇后爲賢妃時所生帝未有子而中宮虛位后因是得立然纔三月而夭追封越王諡冲獻崇寧元年改諡獻愍后之立也鄒浩凡三上疏諫隨削其藁至是或謂浩有殺卓氏而奪其子欺人可也詎可以欺天乎之語徽宗昭暴其事復竄浩昭

州而峻茂典冊后上表謝然浩蓋無是言也

徽宗三十一子長欽宗次堯王檉次鄆王楷次荆王楫
次肅王樞次景王杞次濟王栩次益王棧次高宗次邠
王材次祁王模次莘王植次儀王朴次徐王棣次沂王
栲次鄆王拱次和王棡次信王榛次漢王椿次安康郡
王檉次廣平郡王榘次陳國公機次相國公榘次瀛國
公榘次建安郡王模次嘉國公椅次溫國公棟次英國
公榘次儀國公桐次昌國公柄次潤國公縱檉楫材拱
椿機六王早薨

鄆王楷帝第三子初名煥始封魏國公進高密郡王嘉

王歷奉寧鎮安鎮東武寧保平荆南寧江劔南西川鎮
南河東寧海十一節度使政和八年廷策進士唱名第
一母王妃方有寵遂超拜太傅改王鄆仍提舉皇城司
出入禁省不復限朝暮於外第作飛橋複道以通往來
北伐之役且將以爲元帥會白溝失利而止欽宗立改
鎮鳳翔彰德軍靖康初與諸王皆北遷

肅王樞帝第五子初封吳國公進建安郡王肅王歷節
度六鎮靖康初金人圍京城要帝子弟爲質且求輸兩
河於是遣宰臣張邦昌從樞使幹離不軍爲金人所留
約俟割地畢遣還而挾以北去

景王杞初授武安軍節度使檢校太尉封冀國公大觀
二年改授山南東道節度使加開府儀同三司封文安
郡王政和中授檢校太保尋遷太保改授護國武昌軍
節度使追封景王靖康元年授荆南鎮東軍節度使遷
太傅二年遣詣金營克賀正旦使既歸又從上幸青城
及上皇出郊杞日侍左右衣不解帶食不食肉上皇製
發願文述祈天請命之意以授杞杞頓首泣及北行鬚
髮盡白

濟王栩初授鎮洮軍節度使檢校太尉封魯國公大觀
二年改授彰武軍節度使加開府儀同三司封安康郡
王政和中授檢校太保改荆南清海軍節度使進封濟
王靖康元年授護國寧海軍節度使遷太傅同景王杞
爲賀金人正旦使既還又與何鼎爲請命使金帥給栩
曰自古有南卽有北不可相無今所欲割地而已栩回
以白上且言金帥請與上皇相見上曰豈可使上皇蒙
塵遂自出以栩從行及索諸王家屬栩夫人曹氏避難
他出徐秉哲捕而拘之遂同北去

徐王棣初授鎮江軍節度使檢校太尉封徐國公政和
中授檢校太保宣和中改鎮南軍節度使加開府儀同
三司封高平郡王尋改山南東道河陽三城節度使進

封徐王後從淵聖北去紹興二年有萬州李勃者僞稱
祁王內侍楊公謹與言徐王起居狀勃遂改稱徐王宣
撫使張浚遣赴行在上命王府故吏驗視言非真詔送
大理情得棄市

沂王栲初授橫海軍節度使檢校太尉冀國公政和中
授檢校太保宣和中改劔南西川節度使加開府儀同
三司封河間郡王尋改劔南東川威武軍節度使遷太
保進封沂王後從淵聖出郊至北方與駙馬劉彥文告
上皇左右謀變金遣人按問上皇遣莘王植駙馬蔡絳
等鬻辯凡三日栲彥文氣折金人誅之

和王栻初授靜江軍節度使檢校太尉廣國公三年授
檢校太保尋改定武軍節度使加開府儀同三司封南
康郡王靖康元年授瀛海安化軍節度使檢校太傅追
封和王後從淵聖出郊有遺女一人高宗朝封樂平縣
主出適杜安石命大宗正司主婚

信王榛初授建雄軍節度使檢校太尉封福國公三年
授檢校太保宣和末改安遠軍節度使加開府儀同三
司封平陽郡王靖康元年授慶陽昭化軍節度使遷檢
校太傅進封信王後從淵聖出郊北行至慶源亡匿真
定境中時馬廣與趙邦傑聚兵保五馬山若陰迎榛歸

奉以爲主兩河遺民間風響應榛遣廣詣行在奏之其略曰邦傑與廣忠義之心堅若金石臣自陷賊中頗知其虛實賊今稍墮皆懷歸心且累敗於西夏而契丹亦出攻之今山西諸砦鄉兵約十餘萬力與賊抗但皆苦窘兼闕戎器臣多方存恤惟望朝廷遣兵來援不然久之恐反爲賊用臣於陛下以禮言則君臣以義言則兄弟其憂國念親之心無異願委臣總大軍與諸砦鄉兵約日大舉決見成功廣旣至黃潛善汪伯彥疑其非真上識榛手書遂除河外兵馬都元帥潛善伯彥終疑之廣將行密授朝旨使幾察榛復令廣聽諸路節制廣知事不成遂留于大名府不進會有言榛將渡河入京朝廷因詔擇日還京以伐其謀金人恐廣以援兵至急發兵攻諸砦斷其汲道諸砦遂陷榛亡不知所在或曰後與上皇同居五國城紹興元年鄧州有楊其姓者聚千餘人自稱信王鎮撫使翟興覺詐遣將斬之以聞欽宗皇太子諶朱皇后子也政和七年生爲嫡皇孫祖宗以來所未有徽宗喜蔡京奏除檢校少保常德軍節度使封崇國公從之會王黼得政謀傾京言其以東宮此人主遂降爲高州防禦使靖康元年遷檢校少保昭慶軍節度使大寧郡王尋進檢校少傅寧國軍節度使

四月詔立爲皇太子二年上幸青城命密院同知孫傳兼太子少傅吏部侍郎謝克家兼太子賓客輔太子監國稱制行事未幾金人請二帝諭太子出城統制吳革力請留欲以所募士微服衛太子潰圍以出傳不許乃謀匿民間別求狀類太子者并宦者二人殺之送金人給以宦者竊太子欲投獻都人爭之併傷太子遲疑不決者五日吳玠莫儔督脅甚急范瓊恐變生以危言讐衛士遂擁太子與皇后共車以出百官軍吏奔隨號哭太學諸生擁拜車前太子呼云百姓救我哭聲震天已而北去弟訓

訓乃北地所生有礪山人留遇僧者金人見之曰全似趙家少帝遇僧竊喜紹興十年三京路通詔求宗室遇僧自言少帝第二子守臣遣赴行在過泗州州官孫守信疑之白其守請于朝閣門言淵聖無第二子乃詔守信劾治遇僧伏罪黥隸瓊州後有自北至者曰淵聖小大王訓見居五國城

元懿太子諱粵高宗子也母潘賢妃建炎元年六月生于南京拜檢校少保集慶軍節度使封魏國公金人侵淮南帝幸臨安會苗傅劉正彥作亂逼帝禪位于粵改元明受既而傅等伏誅帝復位乃以粵爲皇太子從幸

建康太子立屬疾宮人誤蹴地上金鑪有聲太子驚悸疾轉劇薨謚元懿

信王璩字潤夫初名伯玖藝祖七世孫秉義郎子彥之子也生而聰慧初伯琮以宗子被選入宮高宗命鞠于婕妤張氏吳才人亦請于帝遂以伯玖命才人母之賜名璩除和州防禦使時生七歲矣伯琮以建國公就傅璩獨居禁中俄拜節度使封吳國公宰執趙鼎劉大中王庶等堅持之命不果行會秦檜專政遂除保大軍節度使封崇國公尋詔赴資善堂聽讀紹興十五年加檢校少保進封思平郡王出就外第時伯琮已封普安郡

王璩官屬禮制相等夷號東西府踰年改武昌軍節度

使二十二年子彥卒璩去官持服終喪還舊官顯仁太后崩普安郡王始立爲皇太子璩因加恩稱皇姪名位始定遷開府儀同三司判大宗正事置司紹興府孝宗卽位璩表請入賀許之特授少保改靜江軍節度使頃之省紹興府宗正事改判西外宗正司璩累章乞閑改醴泉觀使淳熙中除少傅高宗崩奔赴得疾踰年而薨年五十九追封信王累贈太保太師始璩之入宮也儲位未定者垂三十年中外頗以爲疑孝宗旣立天性友愛璩入朝屢召宴內殿呼以官不名也賜予無算子四

人師淳歷忠州團練使永州防禦使師灝師滄師路並
補武翼大夫孫希林特補保義郎

莊文太子諱愔孝宗嫡長子也母郭皇后初名愉補右
內率府副率尋賜名愔除右監門衛大將軍榮州刺史
孝宗爲皇子時愔拜蘄州防禦使及受禪除少保永興
軍節度使封鄧王故事皇子出閣封王兼兩鎮然後加
司空愔自防禦使躡拜少保章異數也乾道元年立爲
皇太子冊廣國夫人錢氏爲妃詔增東宮從衛太子謙
讓及奏捐月給雜物從之三年秋太子病暍醫誤投藥
病劇上皇與帝親視疾爲赦天下越三日薨年二十四

諡莊文太子賢厚上皇與帝皆愛之帝從禮官議服期

以日易月文武百官服衰服一日而除東宮臣僚齊衰
三月臨七日而除比葬帝再至東宮命宰臣奉謚冊大
小祥皆以執政官行禮子挺錢氏所生也甫辟除福州
觀察使封榮國公乾道九年卒贈武當軍節度使追封
豫國公寧宗時命宗子希基爲太子後希基藝祖九世
孫也賜名楷補右千牛衛將軍置教授于府開禧二年
除忠州防禦使嘉定八年更名思正

魏惠憲王諱愷莊文同母弟也初補右內率府副率轉
右監門衛大將軍貴州團練使孝宗受禪拜雄武軍節

度使開府儀同三司封慶王莊文太子薨愷次當立帝
意未決既而以恭王英武類已竟立之加愷雄武保寧
軍節度使追封魏王判寧國府妻華國夫人韋氏特封
韓魏兩國夫人以示優禮賜黃金三千兩白金一萬兩
命宰執設祖于玉津園王登車顧謂虞允文曰更望相
公保全比至鎮奏朝天申節許之府長史上言欲與司
馬分治郡俾王受成愷奏曰臣被命判府今專委長史
司馬是處臣無用之地況一郡置三判府臣恐吏民紛
競不一徒見其擾長史司馬宜主錢穀訟牒俾擬呈臣
依而判之庶上下安事益易治又請增七人貢額朝廷
悉從之愷究心民事築圩田之墮圯者帝手詔嘉勞之
淳熙元年徙判明州輟屬邑田租以贍學得兩岐麥圖
以獻帝復賜手詔曰汝勸課藝植農不游惰宜獲瑞麥
之應加愷荆南集慶軍節度使行江陵尹尋改永興成
德軍節度使揚州牧七年薨于明州年三十五帝素服
發哀於別殿贈淮南武寧軍節度使揚州牧兼徐州牧
諡惠寧王性寬慈上皇雅愛之雖以宗社大計出王於
外然心每念之賜賚不絕訃聞帝泣然曰向所以越次
建儲者正爲此子福氣差薄耳治二郡有仁聲薨之日
四明父老乞建祠立碑以紀遺愛子二人攄早卒柄生

萬曆二十七年刊
宋史卷二百四十六
列傳 七十四

於明州母卜氏信安郡夫人王薨還居行在柄性早慧
帝愛之將內禪升耀州觀察使封嘉國公慶元間封吳
興郡王領昭慶軍節度使開禧三年薨贈太保封沂王
諡靖惠子垓三歲而夭詔立宗室希瞿子爲其後賜名
均領右千牛衛將軍置教授于府尋加福州觀察使後
更名貴和卽鎮王竑也

景獻太子諱詢燕懿王後藝祖十一世孫也初名與愿
寧宗旣失兗王從宰執京鏜等請取與愿養于宮中年
六歲賜名曦除福州觀察使嘉泰二年拜威武軍節度
使封衛國公聽讀資善堂開禧元年時邊事益急金人

請誅首謀用兵者曦用翊善史彌遠計奏韓侂胄輕起
兵端上危宗社宜賜黜罷以安邊境從之曦立爲皇太
子拜開府儀同三司封榮王更名熈詔御朝太子侍立
宰執日赴資善堂會議尋用天禧故事宰輔大臣並兼
師傅賓客太子出居東宮更名詢嘉定十三年薨年二
十九謚景獻

鎮王竑希瞿之子也初沂靖惠王薨無嗣以竑爲之後
賜名均尋改賜名貴和太子詢薨迺立貴和爲皇子賜
名竑授寧武軍節度使封祁國公嘉定十五年五月加
檢校少保封齊國公十七年六月辛未竑生子詔告天

地宗廟社稷宮觀八月癸未賜竑子名銓授左千牛衛
大將軍丁亥銓薨贈復州防禦使追封永寧侯竑上表
稱謝竑好鼓琴丞相史彌遠買美人善鼓琴者納諸御
而厚廩其家使美人矚竑動息必以告美人知書慧黠
竑嬖之宮壁有輿地圖竑指瓊厓曰吾他日得志置史
彌遠於此又嘗呼彌遠爲新恩以他日非新州則恩州
也彌遠聞之嘗因七月七日進乞巧竒玩以覘之竑乘
酒醉於地彌遠大懼日久思以處竑而竑不知也時沂
王猶未有後方選宗室希彊子昀繼之一日彌遠爲其
父飯僧淨慈寺獨與國子學錄鄭清之登惠日閣屏人
語曰皇子不堪負荷聞後沂邸者甚賢今欲擇講官君
其善訓迪之事成彌遠之坐卽君坐也然言出於彌遠
之口入於君之耳若一語洩者吾與君皆族矣清之拱
手曰不敢乃以清之兼魏忠憲王府教授清之日教昀
爲文又購高宗書俾習焉清之上謁彌遠卽以昀詩文
翰墨以示彌遠譽之不容口彌遠嘗問清之吾聞其賢
已熟大要竟何如清之曰其人之賢更僕不能數然一
言以斷之曰不允彌遠領之再三策立之意益堅清之
始以小官兼教授其後累遷兼如故寧宗崩彌遠始遣
清之往告昀以將立之之意再三言之昀默然不應最

後清之乃言曰丞相以清之從遊之久故使布腹心於足下今足下不答一語則清之將何以復命于丞相昀始拱手徐答曰紹興老母在清之以告彌遠益相與歎其不允竑跂足以需宣召久而不至彌遠在禁中遣快行宣皇子令之曰今所宣是沂靖惠王府皇子非萬歲巷皇子苟誤則汝曹皆處斬竑不能自己屬目墻壁間見快行過其府而不入疑焉已而擁一人徑過天已暝不知其爲誰甚惑昀旣至彌遠引入樞前舉哀畢然後召竑竑聞命亟赴至則每過宮門禁衛拒其從者彌遠亦引入樞前舉哀畢引出帷殿帥夏震守之旣而召百官立班聽遺制則引竑仍就舊班竑愕然曰今日之事我豈當仍在此班震給之曰未宣制以前當在此宣制後乃卽位耳竑以爲然未幾遙見燭影中一人已在御坐宣制畢閣門贊呼百官拜舞賀新皇帝卽位竑不肯拜震捽其首下拜皇后矯遺詔竑開府儀同三司進封濟陽郡王判寧國府帝因加竑少保進封濟王九月丁丑以竑克醴泉觀使令就賜第寶慶元年正月庚午湖州人潘壬與其弟丙謀立竑竑聞變匿水竇中壬等得之擁至州治以黃袍加身竑號泣不從不獲已與之約曰汝能勿傷太后官家乎衆許諾遂發軍資庫金帛會

子犒軍命守臣謝周卿率官屬入賀僞爲李全榜揭于門數彌遠廢立罪云今領精兵二十萬水陸進討比明視之皆大湖漁人及巡尉兵卒不滿百人耳竑知其謀不成率州兵討之遣王元春告于朝彌遠命殿司將彭任討之至則事平彌遠令客秦天錫託召醫治竑疾竑本無疾丙戌天錫詣竑諭旨逼竑縊于州治帝輟朝賻銀絹各一千會子萬貫贈少師保靜鎮潼軍節度使給事中盛章權直舍人院王堅一再繳奏詔從之右正言李知孝累奏追奪王爵降封巴陵縣公於是在廷之臣真德秀魏了翁洪咨夔胡夢昱等每以竑爲言彌遠輒惡而斥遠之端平元年詔復官爵妻吳氏爲比丘尼賜惠淨法空大師月給鉢錢百貫景定五年度宗降詔追復元贈節度使德祐元年提領戶部財用兼脩國史常楙請立竑後試禮部侍郎兼中書舍人王應麟請更封大國表墓錫謚命太宗正司議選擇立後迎善氣銷惡運莫先於此下禮部議贈太師尚書令依舊節度使陞封鎮王謚昭肅以田萬畝賜其家遣應麟致祭

宋史卷二百四十六終

宋史卷二百四十七

列傳第六

開府儀同三司柱國錄軍國重事前中書右丞相韓修國史領經筵事都總裁院修
皇明朝列大夫國子監祭酒臣方從哲

憲德郎右春坊右中允管國子監司業事臣黃汝良等奉

勅重校刊

宗室四

子直 子崧 子櫟 子砥

子晝 子瀟 師異 希言

希懌 士晤 士儻 士嶠

士晴 不羣 不棄 不允

萬曆二十七年刊 宋史卷二百四十七 列傳

不怠

善俊

善譽

汝述

叔近

叔向

彥倓

彥楠

彥逾

子直字正之燕王五世孫父令鑠官至寶文閣待制子直以蔭補承務郎累遷少府監主簿改河南少尹時治西內子直有幹才漕使宋昇器之或事有未便子直輒力爭昇每改容謝之除蔡河撥發綱運官會夏旱河水涸轉餉後期貶秩一級提舉三門白波輦運事除直秘閣丁內艱起復累進龍圖閣祕閣脩撰陝西轉運副使初蔡京鑄夾錫錢民病壅滯子直請鑄小鐵錢以權之因範格以進徽宗大說御書宣和通寶四字爲錢文旣成子直奏令民以舊銅錢入官易新鐵錢旬日易得百餘萬緡帝手札以新錢百萬緡付五路均糴細麥命子直領其事民苦限迫詣子直訴者日數百人子直奏請寬其期民使之會蔡京再相言者希京意論子直亂錢法落職奉祠靖康初復祕閣脩撰金人侵洛子直奔荆南潰兵祝靖盛德破荆南城子直匿民家靖等知之來謁言京城已破子直泣說之曰君輩宜亟還都城護社稷取功名無貪財擾州縣也皆應曰諾子直因草檄趣之翌日靖等遂北行紹興元年召見復徵猷閣直學士

知西外宗正司改江西都轉運使時建督府軍須浩繁子漚運餉不絕以功進寶文閣直學士再知西外宗正司三京新復除京畿都轉運使以疾辭卒于家年六十七子漚幼警悟蘇軾過其家抱置膝上謂其父曰此公家千里駒也及長善談論工詩然崇寧大觀間土木繁興子漚每董其役識者鄙之

子崧字伯山燕懿王後五世孫登崇寧五年進士第宣和間官至宗正少卿除徽猷閣直學士知淮寧府汴京失守起兵勤王道阻未得進聞張邦昌僭位以書白康王宜遣師邀金人河上迎請兩宮問罪僭逆若議渡江

恐誤大計遂與知穎昌府何志同等盟傳檄中外已而

聞金人退引兵襄邑遣范瑁徐文中詣濟王請王進兵南京且言國家之制無親王在外者主上特付太王以元帥之權此殆天意亟宜承制號召四方豪傑則中原可傳檄而定王命子崧克大元帥府參議官東南道都總管邦昌家在廬州子崧檄通守趙令儵幾察之且請捕誅其母子以絕姦心又言自圍城以來朝命隔絕乞下諸路凡有事宜並取大元帥府裁決偽檄毋輒行宜撫使范訥逗撓營私所宜加罪宜蠲被兵州縣租經理淮南荆浙形勢之地毋爲羣盜所據檄止諸路毋受邦

昌僞赦移書責邦昌曰人臣當見危致命今議者籍籍謂劫請傾危之計實由閣下不然金人何堅拒孫傳之請而卒歸於閣下也敵既遠去宜速反正若少遲疑則天下共誅逆節雖悔無及矣又遺書王時雍曰諸公相與亡人之國方且以爲佐命功臣不知平日所學何事會邦昌遣使迎王次第白子崧子崧卽貽王書曰似聞謂以京師殘破不可復入止欲卽位軍中便圖遷徙臣竊惑焉夫欲致中興當謹舉措宜先謁宗廟覲母后明正誅賞降需四方若京師果不可都然後徐議所向遂傳檄京師奏于隆祐太后曰諸路先聞二聖北遷易姓改國恐間有假討逆之名以竊據州郡者乞速下明詔諭四方以迎立康王之意庶幾人心慰安奸宄自消矣尋以所部兵會濟州康王卽位子崧請放諸路常平積欠錢又言臺諫爲人主耳目近年用非其人率取旨言事請遵舊制聽學士中丞互舉范祖禹常安民上官均先朝言事盡忠請錄其子帝皆可其奏因建三屯之議一屯澶淵一屯河中陝華一屯青鄆間以張聲勢萬一敵騎南侵則三道並進可成大功除延康殿學士知鎮江府兩浙路兵馬鈐轄上章論王時雍徐秉哲吳玘莫儔范瓊胡思王紹王及之顏博文余大均等逼遷上皇

取太子辱六宮捕宗室竊禁物都人指爲國賊伏望肆諸市朝以爲臣子之戒時滑州兩經殘破子崧薦傅亮可任除亮滑州通判黃潛善沮之命遂寢賊趙萬犯鎮江子崧遣將擊萬於丹徒調鄉兵乘城爲備頃之官軍敗歸鄉兵驚潰子崧率親兵保焦山寺賊據鎮江初昌陵復土司天監苗昌裔謂人曰太祖後當再有天下子崧習聞其說靖康末起兵徽文頗涉不遜子崧與御營統制辛道宗有隙道宗求得其文上之詔御史往案其獄情得帝震怒不欲暴其罪坐以前擅棄城降單州團練副使謫居南雄州紹興二年赦復集英殿脩撰而子崧已卒于貶所

子櫟燕懿王後五世孫登元祐六年進士第靖康中爲汝州太守金人再渝盟破荆湖諸州獨子櫟能保境土李綱言于朝遷寶文閣直學士尋提舉萬壽觀紹興七年卒

子砥藝祖後令珣之子也仕至鴻臚丞北遷至燕山久之欲遁歸乃遣其徒朱國寶王孝安至中京求得上皇宸翰懷之以歸建炎二年六月至行在帝命輔臣召問于都堂子砥言金人講和以用兵我國歛兵以待和往者契丹主和議女真主用兵十餘年間竟滅契丹今復

蹈其轍譬人畏虎嚼虎以肉食盡終必食人若設罾
待之庶能制虎因復官已而賜對稱旨命知台州李

子晝字叔問燕王五世孫少警敏強記工書孫景宣憲
州通判宣和初克詳定九域圖志編脩官出知澤州改
密州詔爲刑部員外郎以憂去建炎四年遷吏部員外
郎尋用大宗正士儂薦遷尚書左司員外郎兼權貨務
歲收茶鹽香錢六百九萬餘緡以功進秩一階試太常
少卿集太常因革禮八十篇爲二十七卷上言復春分
祀高禘禮除權禮部侍郎遷徽猷待制樞密都承旨以
公族爲侍從及改官制後都承旨用文臣皆自子晝始
衢嚴信饒之民生子多不舉子晝請禁絕之累求補外
遷徽猷閣直學士知秀州旣而奉祠以歸寓于衢紹興
十二年卒年五十四

子瀟字清卿秦康惠王後孝靖公令奧之子也七歲而
孤家貧力學登宣和進士第調真州刑曹掾與守爭
獄事解官去改衢州推官胡唐老奇其才任之屬時多
故子瀟佐唐老繕完城具苗劉兵至城下不能攻以功
進一秩累官吏部郎中求補外遷戶部郎中總領江淮
軍馬錢糧諸司饋禮月以千緡悉歸之公帑除直秘閣
兩淮轉運副使朝廷遣人檢沙田蘆場欲槩增租額子

瀟以承買異冒占力止之時議者言田之並太湖者被
水患宜分道諸浦注之江詔子瀟往案視還言太湖當
數州巨浸豈松江一川所能獨泄昔人於常熟北開浦
二十四以達大江又開浦十於崑山東南以入海今皆
湮塞宜加疏浚從之遂浚常熟東柵至雉浦入于涇谷
又疏鑿福山塘至尚市橋北注大江分殺其勢水患用
息明州守趙善繼治郡殘酷子瀟率諸監司劾罷之除
直敷文閣知臨安府吏不能欺禁權家傲人子女爲僕
妾者詔權戶部侍郎陞華文閣待制復知臨安府調三
衙卒脩築都城不擾而辦金主亮渝盟子瀟獻助軍錢
十五萬緡特遷一秩帝幸建康克行宮留守參謀官扈
蹕還復知臨安府金人來議和子瀟謂事情叵測宜以
軍禮待之孝宗嗣位志圖恢復子瀟練兵習爲鵝鸛魚
麗陣上觀於便殿嘉之賜金帶擢敷文閣直學士移知
明州沿海制置使臺諫王十朋王大寶抗疏留之帝曰
朕委以防海行召還矣初海寇以賂通郡胥吏吏反爲
之用匿其蹤迹賊遂大熾商舶不通子瀟以禮延土豪
俾率郡胥分道入海告之曰用命者有厚賞不則殺無
貸胥衆震恐爭指賊處悉禽獲凡豪猾爲賊囊橐者窮
治之海道遂平陞龍圖閣直學士知福州歲饑告糴旁

郡米價頓平民賴以濟進龍圖閣學士移知泉州吏有掠民女爲妾者其妻妬悍殺而磔之貯以缶抵其兄興化掾安廨中官父詣郡訴吏不決于瀟訪知狀亟遣人往興化果得缶以歸獄遂決其發槩槩類此乾道二年卒于官年六十六

師異字從善系出燕懿王王生彰化軍節度使惟忠惟忠生宣城侯從謹從謹生崇國公世恬世恬生嘉國公令駿中興初韓世清挾令駿爲變裂黃旗被其身固拒獲免令駿生朝奉郎子笈子笈生和州防禦使伯驥伯驥少從高宗于康邸以文藝侍左右師異伯驥之子也

舉進士第除司農簿遷金部郎中孝宗奇其才顧遇頗厚師異奏左右曹度支倉部宜立總計司歸併財物之數以絕吏奸制可知吉州卽山鍊銅足冶欠額二十萬進戶部郎官淮東總領光宗初擢大府少卿知秀州改淮南運判時郡鐵錢不行鹽商弗至師異請發度牒出倉粟以收鐵錢鹽利遂通累遷司農卿知臨安府有僧號散聖者以妖術惑衆師異捕治黥之韓侂胄用事師異附之遂得尹京侂胄生日百官爭貢珍異師異最後至出小合曰願獻少果核侂胄啓之乃粟金蒲萄小架上綴大珠百餘衆慚沮侂胄有愛妾十四人或獻北珠

冠四枚於侂胄侂胄以遺四妾其十人亦欲之侂胄未
有以應也師彛聞之亟出錢十萬緡市比珠製十冠以
獻妾爲求遷官得轉工部侍郎侂胄嘗飲南園過山莊
顧竹籬茅舍謂師彛曰此真田舍間氣象但欠犬吠鷄
鳴耳俄聞犬嗥叢薄間視之乃師彛也侂胄大笑久之
以工部尚書知臨安府侂胄將用兵師彛度侂胄材踈
意廣必召禍乃持異論侍御史鄧友龍劾罷之侂胄死
其黨多坐謫以師彛嘗與侂胄異故獲用除寶謨閣直
學士知鎮江府會荆湖始置制閫以命師彛給事中蔡
幼學繳其命遂罷歸未幾詔爲兵部尚書知臨安府幼
學時爲學士亦不草詔留元剛草之時楮輕糴貴師彛
尹京未數月楮價寢昂糴亦稍平執政愈益賢之會武
學士柯子冲盧宣德以事至府師彛擅撻遺之衆盡譴
文武二學之士交投牒師彛乃罷免與祠卒于家年七
十師彛四尹臨安有能聲嘗鈎致民罪沒其家貲諂事
權貴人以是鄙之

希言字若訥惠王令應元孫也淳熙十四年登第調衢
州司戶合郡民以計表其坊里標其戶數爲圖獻于守
守才之西安令不職守檄希言攝邑漕善令會嚴州請
復烏龍嶺稅場檄希言往訪之俾令得復職希言力陳

烏龍場不當復漕怒曰衢已復孔步章戴二場何烏龍獨不可復希言謂二場當併罷去漕不能奪二場竟亦廢改吉州司理屬邑有誣人以殺人罪者吏治之急囚誣服希言鞫得實檄縣他捕乃得真盜用楊萬里周必大薦授臨安府司法改淮西總所幹辦移書約諸郡綱必時發至卽受納無滯留始至軍庫見錢不滿千緡比去庫錢克溢知臨安仁和縣闢學宮四百餘畝適大旱蝗集御前蘆場中亘數里希言欲去蘆以除害中使沮其策希言驅卒燔之臨平塘隄決希言督役親捧土投石兵民爭奮堤成因築重隄後不復決民病和買絹折

錢重希言節公費代其輸除大社令遷樞密院編脩官兼右司上言諸將但務城守敵來不拒去不復追異時之憂殆不止保江而已宜諭諸將一軍受圍諸軍共守敵不渡淮則均受賞以戰爲守毋以守爲守遷宗正丞請南班得與輪對許之累遷秘書丞著作郎軍器少監皆兼右司又克密院檢詳爲宰屬樞掾凡六年奉祠去嘉定十七年卒年六十一贈資政殿大學士封越國公謚忠憲子與權登進士第再中刑法科官至開府儀同三司

希懌字伯和燕王八世孫登淳熙十四年進士第趙汝

愚帥福建希惲爲屬吏嘗言治人如脩身治政如理家
愛民如處昆弟取古今官著惠愛者緝爲一編曰是吾
師矣汝愚嘉之薦于憲辛棄疾棄疾尚氣僚吏不敢與
可否希惲獨盡言無所避屬邑候官苦稅重每不登額
希惲稽核公帑羨錢以足之棄疾亦薦其能汝愚當國
調江東運司幹辦同寅有坐僂胄黨者諸司莫敢薦希
惲賢其人請以薦已者薦之改太平州通判先是盜黥
而逃者捕得處死希惲言強盜特貸命而輒逃者斬今
黥罪致死非法之平也自是皆減死論遷江西茶鹽提
舉歲饑惡少聚劫希惲將自臨按幕屬力止之不聽曰
希惲不出饑民終不得食且召亂矣遂行發粟賑給禽
首謀者治之其黨遂散陞本路帥兼漕事黑風峒羅世
傳寇郴陽奸民潛通賊陰濟以糧希惲捕治之賊乏食
乃去未幾李元礪寇郴陳廷佐寇南安復誘羅世傳與
合劫掠至龍泉有何光世者能知賊動息希惲授光世
計俾誘世傳誅元礪以自贖功未竟移知平江府其後
世傳果縛元礪以獻廷佐勢孤亦降移知太平州希惲
爲倅日習知其民利病遂損折市價減權酷額以蘇民
力已而乞祠遷端明殿學士換昭信軍節度使開府儀
同三司致仕嘉定五年卒年五十八贈少保封成國公

士晤字公美濮安懿王曾孫也天資警敏兒時儼如成人比弱冠爲右監門衛大將軍貴州團練使從上皇北遷次洛州東與諸宗室議欲遁還據城謀未就而金人圍合皆散走士晤乘驢西亡夜半盜斂驢去徒步疾趨遲明抵武安酒家語人曰我皇叔也邑官聞之來謁資以衣冠鞍馬因募得少壯百餘人從至磁州招集義兵以解洛圍旬日間得勝兵五千人歸附者數萬時洛州守臣王麟欲叛降敵軍民怒殺之推統制韓一爲主士晤夜半薄城下力戰破圍翌日入城部分守禦敵治壕塹樹鹿角示以持久士晤礪將士死守飛火砲碎其攻具以計生得其首領敵乃解圍去以功遷權知洛州仍兼防禦使建炎二年金人再犯洛糧盡援絕衆不能守乃擁士晤出城由白家灘抵大名府詔赴行在紹興五年遷泉州觀察使再遷平海軍承宣使知南外宗正事時泉邸新建向學者少士晤奏宗子善軫文藝卓絕衆所推譽乞免文解由是人知激勸遷節度使未拜而卒年四十六贈少師追封和義郡王淳熙中謚忠靖子不流歷臨安紹興帥治有聲

士儻字立之郇康孝王仲御第四子有大志好學善屬文初補右班殿直累遷忠州防禦使鄭州觀察使由寧

遠軍承宣使轉權同知大宗正事時康王建大元帥府士儂請於孟太后乞命帥府得承制便宜行事又請奉王承大統太后從之王遂卽位除光山軍節度使扈蹕南幸黃潛善等用事士儂論其誤國潛善斥之出知南外宗正事會苗傅劉正彥作亂士儂易服入杭以蠟書遺張浚趣其勤王復遺呂頤浩書勉其與浚同濟國難苗傅等怒浚浚坐謫復遺浚書謂朝廷無他意俾賊勿疑耳事平加檢校少保除同知大宗正事丁母憂起復除大宗正事請序位安定郡王下從之累乞祠不許以定策功詔其子不議改文秩不怕易環衛官加士儂檢校少師尋加開府儀同三司判大宗正事人觀勸帝留意恤民金人旣歸河南陝西地命士儂謁陵寢遂入栢城披歷榛莽隨宜葺治禮畢而還特封齊安郡王以旌其勞尋權主奉濮安懿王祠專軍興罷宗室賜予至有喪不能斂者士儂以聞詔總麻袒免親任環衛官兩身亡者賜錢有差士儂數言事忤秦檜及岳飛被誣士儂力辨曰中原未靖禍及忠義是忘二聖不欲復中原也臣以百口保飛無他檜大怒諷言者論士儂交通飛蹤迹詭秘事切聖躬遂奪官中丞万俟卨復希旨連擊之謫居于建凡十二年而薨年七十帝哀之贈太傅追封

循王六子皆進官二階長子不允方苗傅之亂封股納蠟書持告張浚以功轉兩官易文資從趙哲收復建州殺葉濃以功賜爵二級

士崱字仰夫太宗五世孫初以廕補官累轉太子率府副宰建炎初隆祐太后幸洪州敵奄至百司散走士崱至一大船中見二帝御容負以走遇潰兵數百同行至山中衆欲聚爲盜士崱出御容示之曰盜不過求食爲朝夕計耳孰若仰給州縣士崱以近屬諭之必從如此則今日不饑餓後日不失賞是一舉而兩得也衆聽命乃走謁太后虔州會虔民作亂鄉兵在外爲應與官軍相持士崱詣執政謂當請太后急肆赦人知免死庶可安集又宜急諭城中城中定則外寇可弭譬如服藥心腹已安外禦風濕乃餘事耳赦既下城中遂定遷右監門衛大將軍惠州防禦使紹興二十一年卒贈建寧軍承宣使追封建安郡王

士靖太宗之後商濮王之裔也從上皇俱北遷乘間變姓名入僧寺中落髮衣僧衣以行抵會稽扈駕循幸以覃恩轉千牛衛將軍奉朝請而卒

不羣字介然太宗六世孫宣和中量試授承事郎靖康初宰濟南章丘縣縣當山東河北之衝不羣募效用五

千人增城浚濠爲戰守備敵攻圍兩月不能下遷維州
通判陞直秘閣通判鎮江府辟克兩浙宣撫司主管機
宜文字高宗在越詔改郴州時羣盜出沒湖湘間不羣
嚴備禦盜不能犯進直顯謨閣移知鼎州克湖北兵馬
副鈐轄旣而朝廷慮郴失守復留不羣于郴會岳飛破
曹成成遁因犯郴不羣乘城固守拒郤之進直寶文閣
移知宣州軍需以時辦而民不擾進秩二階知廬州鄜
瓊叛擁不羣北去尋釋之以歸帝召見問瓊叛故不羣
曰由劉錡除制置瓊等以爲圖已兼撫諭後時故叛帝
悔之除知荆南府累遷兩浙路轉運副使卒于官

不棄字德夫太宗之裔紹興中爲江東轉運判官秦檜
忌四川宣撫使鄭剛中以不棄能制之除大府少卿四
川宣撫司總領官初趙開總蜀賦宣撫司文移率用申
狀不棄至官用張憲成故事以平牒見剛中剛中愕然
久之始悟其不隸已遂有隙不棄欲盡取宣撫司所儲
剛中不與不棄怒剛中辟利州轉運使王陟兼本司叅
議不棄劾罷之二人愈不相能檜併召還剛中在蜀服
用頗踰制不棄復文致其事檜乃罷剛中陞不棄敷文
閣待制知臨安府踰年改工部侍郎尋除敷政閣直學
士知紹興府時浙東旱饑民多流亡提舉秦昌時檜見

子也不棄言其悉心振恤全活甚衆昌時得遷秩其媚
檜如此未幾卒

不尤有武力靖康之難與王明募義兵與金人戰雄張
河南北盜皆避其鋒曰此小使軍也高宗卽位引衆歸
補武翼郎從岳飛平湖寇飛死檜奪其兵遣守橫州而
卒子善悉進士登第累官敷文閣直學士兩浙轉運副
使

不怠字仁仲嗣濮王宗暉曾孫也父士圖從上皇北遷
遙拜集慶軍節度使不怠初補保義郎紹興二十七年
登第易左宜義郎調婺州金華丞治縣豪何汝翼械請
於郡編隸他州邑人懼服除永州通判郡歲輸米倍數
其羸民病之不怠言於守損其數帥司檄不怠錄靖州
獄辯出寃者數十百人靖人德之繪其像以祠除知開
州開在巴東俗鄙陋不怠爲興學俾民知孝義郡有鹽
井舊長吏必遣所親監之私其利不怠罷遣鹽利倍入
郡計用饒以羨餘代民輸夏秋兩稅及天申節銀絹在
開二年民絕鬪爭夜戶不閉諸司交薦以比古循吏轉
夔州轉運判官開人數千遮城門不得行至夔民病上
供銀時部使者以親故攝大寧鹽場專其利不怠斥去
而鹽獲羨餘乃出錢市羨鹽數十萬斤易米得三萬餘

斛運抵湖北市銀以歸代諸郡納上供銀省緡錢十萬
餘萬改成都路轉運判官適歲饑不怠行抵瀘南督官
錢五萬緡遣吏分糴比至下令曰米至矣富民爭發粟
米價遂平雙流朱氏獨閉糴邑民羣聚發其廩不怠抵
朱氏法籍其米黥盜米者民遂定永康軍歲治都江堰
籠石蛇絕江過水以灌數郡田吏盜金減役夫堰不固
而圯田失水故歲屢饑不怠躬視操板築繩吏以法乃
出令民業耕者田主貸之事末作者富民振之老幼疾
患者官爲粥視全活數百萬黎州青羌奴結見反制司
調兵往戍屬不怠給餉故事富人出糧而下戶以力致
于邊不怠曰民饑不可擾也以糴餘米發卒運之巴南
朝廷命不怠攝制司初官兵敗前制使遣人賂奴結見
以和不怠曰奴結見吐蕃小種也今且和若大族何不
聽會會豪夢東畜列率數千人入漢地二百餘里成都
大恐不怠靜以鎮之召僚屬飲夜遣步將領飛山軍徑
赴沉黎又徙綿州兵戍邛州爲後援戒之曰堅守勿動
密檄諸蕃部生獲吐蕃一人賞十縑殺一人二縑於是
邛部川首領崖襍合諸部落大破吐蕃於漢源斬夢東
畜列首來獻九十有六日而平嘉州虛恨蠻入寇不怠
標吐蕃百境上蠻懼一夕遁去不怠乃令緣邊家出可

夫一人分戍諸堡復其家不怠罷歸蜀人送者自成都至雙流遮道不得行未幾除成都提刑改江西路轉運判官廷臣薦其賢詔授右監門衛大將軍惠州防禦使知大宗正事非常制也吏白承受奏請須用中貴人不怠曰有司不存乎罷不用中貴人或請見輒謝出之遷明州觀察使俄陞招慶軍承宣使金人完顏烈來聘克館伴副使金使從者舊見館使皆對揖不怠不爲禮宴玉津園不怠連射皆中使者驚服不怠以文行訓勉族屬薦其秀傑者奏新學宮增廣弟子員做大學校定法置自訟齋使有過者讀書其中人人感勵淳熙十四年

卒年六十七贈開府儀同三司封崇國公不怠性篤生七歲遭父北遷每思慕涕泣長力學母曹氏止之答曰君父讎未報非敢志富貴也登第時已入仕法當超兩秩請回授其母母封法止令人高宗嘉其志特封郡夫人居官所至有聲立朝好言天下事蜀中武帥操重權不怠請復置安撫司相維而治其論王抃不宜揀選諸路軍王友直不可爲副都指揮使尤人所難言者遇大早一日九疏勸上求直言通下情退而燔其藁時衣上書狂悖多抵罪不怠謂太上皇帝不罪言者此宜書之御座右帝悚然可之既嘉其忠諫每宴禁中帝飲

之酒顧謂皇太子曰此賢宗室也一日坐待漏院有給事中白英國公借擊毬馬不怠正色曰上惟一皇孫萬一馬驚墮斬汝輩無益也馬竟不可得所敬者朱熹張栻栻死爲請謚又請用熹其好尚如此

善俊字俊臣太宗七世孫父不衰閩路兵馬鈐轄善俊初補承節郎紹興二十七年登第換左承務郎調南城丞改昭信軍簽判竒之虞允文亦薦其有邊帥才除幹辦諸司審計司知郴州敷奏稱旨留爲大府寺丞尋攝帥知廬州會歲旱江浙饑民麋至善俊括境內官田均給之貸牛種儼屋以居死者爲給槥人至如歸州城舊

毀于兵善俊葺完之因言異時恃焦湖以通饋餉今既堙涸宜募鄉兵保孤姥二山治屋以儲粟敵或敗盟則吾城守有餘餉道無乏矣又增築學舍新包拯祠春秋祀之人感其化累遷龍圖閣直學士移知建州建俗生子往往不舉善俊痛繩之給金穀捐已奉以助其費再知廬州首言和好不可恃當高城浚池以爲備復芍陂七門堰農政用修免責屬邑坊場河渡羨錢百姓德之以父憂去服闋起知鄂州適南市火善俊亟往視事弛竹木稅發粟振民開古溝創火巷以絕後患僚屬爭言用度將不足善俊曰吾將瘠己肥人乃省燕游車騎鼓

吹之費郡計用饒代輸民役錢再知建州歲饑民羣趨富家發其廩監司議調兵掩捕善俊曰是趣亂也諭許自新平米價民乃定邑尉入盜十三人死罪以希賞善俊辯其寃徙知隆興府移江西轉運副使時朝廷議減月椿錢善俊言及州不及縣則縣仍迫取於民猶不減也宜一路通裁其額下之漕臣科郡縣輕重均減之又奏和買已是白科從而折變益加糜費其數反重於正絹併乞蠲減黥卒遇赦還者刺克舖兵可除民害所言多見用轉湖南帥郴桂地絕遠守多非才善俊謂宜精其選代輸潭州經總制錢停醴陵淶水渡錢加秘閣修撰移知鎮江府丁母憂終喪而卒年六十四善俊風儀秀整喜功名尤好論事孝宗時日中有黑子地屢震每以飭邊備爲戒孝宗英武獨運缺相者累年善俊極言相位不可無人尤人所難言者

善譽字靜之父不倚大宗之後也善譽幼敏慧力學乾道五年試禮部第一初調昌國簿攝邑事勸編戶哀金買田以助嫁娶喪葬捕得海盜全黨守欲上其功善譽曰奈何以人命希賞守益賢之薦于朝授兩浙運幹改知撫州臨川縣縣嘗預借民賦善譽閱籍發逋負按籍征催卒以時辦集遂罷預借改常州添差通判史浩言

其賢詔赴部堂審察累遷大理丞湖北常平茶鹽提舉
會大旱善譽通融諸郡常平計戶振貸嗣歲麥禾倍收
民爭負以償奏罷稅場十餘渡四十五民便之俾諸郡
售田委郡文學董其人以給計偕者移潼川路提刑轉
運判官遂寧守徐詡乏廉聲部使者以其故御史寬假
之善譽過遂寧詡出迎善譽抑使循廊詡大沮郡人聞
之爭訟其過善譽劾諸朝宰相王淮善詡寢其章善譽
徑以聞罷詡又以羨貲給諸郡置莊民生子及娠者俱
給米威惠並孚宗子寓蜀者少業儒善譽卽郡庠立學
以教之人始感勵引年乞祠歸處一室以圖書自娛無
疾而卒年四十七時淳熙十六年也善譽早失怙恃撫
育諸季備至居官廉靖自將多所著述郭雍朱熹嘗取
其易說云

汝述字明可太宗八世孫曾祖士說從二帝北遷臨河
罵敵而死汝述登淳熙十一年進士第調南劍州順昌
尉嘉定六年詔主管官告院自是常兼宰士累遷將作
少監權侍立脩注官八年除起居郎兼密院都承旨俄
遷兵部侍郎以母憂去服闋改刑部侍郎遷尚書知平
江府卒汝述爲尉應詔上封事論議懇惻立朝薦引多
知名之士然爲時相所親躡躋通顯人亦以此少之

叔近悼王元孫榮良公克類之子也建炎元年爲秀州守杭卒陳通反詔辛道宗將西兵討之兵潰爲亂抵秀州城下叔近乘城諭以禍福亂兵乃去未幾差權兩浙提刑叔近招通通聽命叔近以素隊數十人入賊城衆猶不解甲叔近置酒推誠待之遂皆感服城中稍定叔近奏通初無叛心止緣葉夢得賞不時給遂至紛爭今已就招請赦其徒二百餘人帝許之臺諫皆言不可遂寢叔近還秀州已而王淵兵至杭詐傳呼云趙秀州來通郊迎淵遂誅之初淵在汴京狎媚周氏周氏後歸叔近淵銜之乃誣叔近通賊奪職拘于州以朱芾代之芾肆殘虐軍民怨憤小卒徐明率衆囚芾迎叔近領郡事叔近不得辭因撫定之請擇守于朝奏未達朝廷命張俊致討俊淵部曲也辭行淵謂之曰叔近在彼俊諭意領兵至郡叔近出迎俊叱令置對方操筆羣刀遽前斷其右臂叔近呼曰我宗室也俊曰汝旣從賊何云宗室語未竟已折首于地徐明等見叔近死遂反戈嬰城縱火驅掠翌日俊斬關入捕明等誅之取周氏歸于淵紹興九年御史言叔近之寃贈集英殿脩撰

叔向魏王之系也方汴京破時叔向潛出之京西金人退引衆屯青城入至都堂叱王時雍等速歸政置救駕

義兵其後爲部將于渙上變告叔向謀爲亂詔劉光世捕誅之

彥倓字安卿彭城侯叔聚曾孫也父公廣饒州太守彥倓初調溧陽尉邑民潘氏兄弟橫邑中號三虎畜僮僕數百邑官莫敢取誰何彥倓白其守治之縛潘氏昆弟正其罪改楊州司戶攝獄掾有告主藏吏盜錢餘千萬治之急吏泣請死彥倓察其情屏人問則諸吏共貸也乃許自首免罪一日而畢改平江府推官攝宜興縣縣自中興後預借民明年稅民挾此得慢其令彥倓請禁預借邑遂易治知臨安於潛縣縣胥往往通臺省吏得肆

其奸彥倓執其黠者械送府臺省吏從中救之彥倓力爭竟抵胥罪浮橋屢以水敗彥倓梁以石民免溺死陞臨安府通判開禧初知興國軍歲旱蝗而軍需益急屬邑令吳格負上供銀尤多彥倓坐累貶秩格愧謝彥倓曰屬時多艱宜寬民力以崇根本何謝爲潰卒據外城爲變彥倓募能斬捕者賞之旣而各斬首以獻散其餘黨累遷湖南運判徯人羅孟傳反累歲不能平彥倓謂帥臣曰徯人讎殺乃其常情況主斷不平是激之使叛也能遣謀者離其黨與俾還自相讎破之易矣帥從其計遂降孟傳尋知紹興府楮價輕彥倓權以法民便之

復鹿鳴禮置興賢莊以資其費築捍海石塘亦置莊以備增築會旱饑民聚陂湖中彥倏取死囚幕首刎足徇於衆曰此劫淩藕者也遂散其衆乃第民高下損其稅有差免輸湖籍田米舉緡錢四十萬以助荒政民賴以濟詔改大府少卿遷顯謨閣知太平州調江西轉運使嘉定十一年卒于官年六十四

彥櫛字文長悼王七世孫祖訓之在忠義傳彥櫛登乾道二年進士第尉樂清會大旱令循故事禱雨而責租益急彥櫛曰損歛已責所以招和氣何禱爲已而果雨累官福建路運幹屬邑負振鹽本錢數千萬累歲不能償彥櫛白其長蠲之慶元初知晉陵縣歲饑彥櫛振恤有方所活幾二十萬又以羨錢爲五等戶代輸擢監登聞檢院時韓侂胄方柄用朝士悉趨其門彥櫛切歎惋出知汀州州民葉姓者嘯聚汀贛間彥櫛遣將捕戮之遷廣西提刑諸郡鬻官鹽取息之六以奉漕司後增至八分彥櫛復其舊以蘇民力朝廷從之侂胄死詔戶部侍郎兼樞密院檢詳士大夫前與兵議者坐侂胄黨將併逐之彥櫛歎曰士方以僞學廢今又以兵端斥去苟欲錮士何患無名每見帝必言才難遷湖廣總領舊士卒物故大將不落其籍而私其月請彥櫛置別籍稽核

之或傳軍中有怨言彥楠曰不樂者主帥耳何損士卒
持之三年掛虛籍者贏三萬額減錢百萬緡用度以饒
比去餘七百萬而諸路累積逋負猶四百萬盡蠲之知
平江府郡之昆山並大海盜出沒莫可蹤迹彥楠奏分
其半置嘉定縣屯兵以守轉寶謨閣待制卒于官年七
十一

彥逾字德先魏悼王後崇簡國公叔寓曾孫也紹興三
十年登第淳熙五年知秀州累遷大府少卿四川總領
將入境利西帥吳挺遣屬吏安丙來迓彥逾見郎喜其
人從容問之曰太尉統衆六萬得無虛籍乎丙以情告
彥逾遺挺書俾損虛籍數千以寬四川之賦挺不敢隱
改知鎮江府郡適旱饑彥逾節浮費發粟振糴民賴以
濟遷戶部侍郎工部尚書孝宗崩光宗疾不能持喪樞
密趙汝愚議請立嘉王爲皇帝欲倚殿帥郭杲爲用遣
中郎將范任告之杲不應時中外洶洶彥逾見汝愚對
泣汝愚密告以翊戴之議彥逾大喜力贊其決郭杲嘗
被誣彥逾爲白于帝杲德之遂馳告杲曰彥逾與樞密
第能謀之耳太尉爲國虎臣當任其責杲未及對彥逾
急責之杲許諾遂領兵爲衛寧宗卽位汝愚謂彥逾曰
我輩宗臣不當言功會留正免相汝愚登右揆彥逾以

端明殿學士出知建康兼江東安撫使未行改四川安撫制置使兼知成都府彥逾為政不擾蜀人便安之以定策勳累遷資政殿大學士嘉泰間知明州兼沿海制置使嘉定間乞祠以歸尋卒彥逾始與汝愚協濟大計冀汝愚引已共政及外除頗缺望乃疏當時名臣上之目為汝愚黨帝曰是疑汝愚其兩入蜀皆有聲然吳氏世守武興兼利西安撫操重權吳挺卒朝廷用丘崇議併利西安撫於東路以革世將之弊而彥逾奏復利西安撫乃領以武帥其後吳曦因之以生變人以是咎彥逾云

宋史卷二百四十七終

宋史卷二百四十八

列傳第七

開府儀同三司上柱國錄軍國重事前中書右丞相兼修國史領經筵事都總裁脫脫等修

皇明朝列大夫國子監祭酒臣方從哲

承德郎右春坊右中允管國子監計業事臣黃汝良等奉

勅重校刊

公主

秦國大長公主

太祖六女

太宗七女

真宗二女

仁宗十三女

英宗四女

神宗十女

哲宗四女

徽宗三十四女

孝宗二女

光宗三女

魏惠獻王一女

寧宗一女

理宗一女

秦國大長公主太祖同母妹也初適米福德福德卒太祖卽位建隆元年封燕國長公主再適忠武軍節度使高懷德賜第興寧坊開寶六年十月死太祖臨哭廢朝五日賜謚恭懿真宗追封大長公主元符三年改秦國政和四年改封恭懿大長帝姬有姊一人未笄而夭建隆三年追封陳國長公主元符改封荆國大長公主政和改封恭獻大長帝姬

太祖六女申國成國永國三公主皆早亡

魏國大長公主開寶三年封昭慶公主下嫁左衛將軍王承衍賜第景龍門外太宗卽位進封鄭國淳化元年改封秦國真宗至道三年進長公主大中祥符元年遷賜謚賢肅元符改封魏國大長公主政和改賢肅大長帝姬

魯國大長公主開寶五年封延慶公主下嫁左衛將軍石保吉太宗卽位進封許國淳化元年改晉國真宗初進長公主大中祥符二年進大長公主薨賜謚賢靖元符改封魯國政和改賢肅大長帝姬

陳國大長公主開寶五年封永慶公主下嫁右衛將軍
魏咸信太宗卽位進封魏國淳化元年改齊國真宗初
進許國長公主咸平二年薨謚貞惠後改恭惠景祐三
年追封大長公主元符改封陳國政和改賢惠大長帝
姬

太宗七女長滕國公主早亡

徐國大長公主太平興國九年封蔡國下嫁左衛將軍
吳元扆淳化元年改魏國薨謚英惠至道三年追封燕
國長公主景祐三年進大長公主元符改徐國政和改
英惠大長帝姬

邠國大長公主太平興國七年爲尼號員明大師八年
卒至道三年追封曹國長公主景祐三年進大長公主
元符改邠國

楊國大長公主至道三年封宣慈長公主咸平五年進
魯國下嫁左衛將軍柴宗慶賜第普寧坊宗慶禹錫之
孫帝命主以婦禮謁禹錫第歷徙韓魏徐福四國仁宗
立進鄧國大長公主明道二年薨進封晉國謚和靖元
符封楊國政和改和靖大長帝姬主性妬宗慶無子以兄
子爲後

雍國大長公主至道三年封賢懿長公主咸平六年下

嫁右衛將軍王貽永進封鄭國賜第景德元年薨諡懿
順景祐三年追封大長公主皇祐三年改韓國徽宗改
封雍國政和改懿順大長帝姬

衛國大長公主至道三年封壽昌長公主大中祥符二
年進封陳國改吳國號報慈正覺大師改楚國又改邠
國天禧二年改建國乾興元年封申國大長公主天聖
二年薨賜諡慈明徽宗改衛國政和改慈明大長帝姬
荆國大長公主幼不好弄未嘗出房闈太宗嘗發寶藏
令諸女擇取之欲以觀其志主獨無所取真宗卽位封
萬壽長公主改隨國下嫁駙馬都尉李遵勗舊制選尚

者降其父爲兄弟行時遵勗父繼昌亡恙主因繼昌生
日以舅禮謁之帝聞密以兼衣寶帶器幣助其爲壽遵
勗賓客皆一時賢士每燕集主必親視饗餼嘗有盜入
主第帝命有司訊捕主請出所逮繫人以私錢募告者
果得真盜法當死復請賞之歷封越宿鄂冀四國明道
元年進魏國初遵勗出守許州暴得疾主亟欲馳視之
左右白須奏得報乃可行主不待報而往從者纔五六
人帝聞遽命內侍督諸縣邏兵以衛主車其後居夫喪
衰麻未嘗去身服除不復御華麗嘗燕禁中帝親爲簪
花辭曰自誓不復爲此久矣嘗因浴仆地傷右肱帝遣

內侍責侍者主曰年衰力弱不任步趨非左右之過由是悉得免主善筆札喜圖史能爲歌詩尤善女工之事嘗誠諸子以忠義自守無恃吾以速悔尤視他子與已出均及病日帝挾醫診視自后妃以下皆至第候問帝親舐其目左右皆感泣帝亦悲慟曰先帝伯仲之籍十有四人今獨存大主奈何嬰斯疾復顧問子孫所欲主曰豈可以母病邀賞邪賚白金三千兩辭不受帝因謂從臣曰大主之疾倘可移於朕亦所不避也主雖喪明平居隱几沖淡自若誠諸子曰汝父遺令柩中無藏金玉時衣數襲而已吾歿後當亦如是皇祐三年薨年六

十四帝臨奠輟視朝五日追封齊國大長公主謚獻穆徽宗改封荆國政和改獻穆大長帝姬

真宗二女長惠國公主早亡

昇國大長公主初入道明道二年封衛國長公主號清虛靈照大師慶曆七年追封魯國謚昭懷徽宗改封昇國大長公主政和改昭懷大長帝姬

仁宗十三女徐國鄧國鄭國楚國商國魯國唐國陳國豫國九公主皆早亡

周陳國大長公主帝長女也寶元二年封福康嘉祐二年進封兗國主幼警慧性純孝帝嘗不豫主侍左右徒

既籲天乞以身代帝隆愛之帝念章懿太后不及享天下養故擇其兄子李瑋使尚主瑋朴陋與主積不相能主中夜扣皇城門入訴瑋皇懼自劾諫官王陶論宮門夜開乞繩治護衛御史又共論主第內臣多不謹帝爲黜都監梁懷一輩十餘人後數年不復協詔出瑋於外主降封沂屏居內廷久之復召瑋使爲附馬都尉如初英宗立進越國長公主神宗治平四年進楚國大長公主熙寧三年薨年三十三以瑋奉主無狀貶陳州輔臣議謚帝以主事仁祖孝命曰莊孝追封秦國徽宗加周陳國政和改封莊孝明懿大長帝姬

秦魯國賢穆明懿大長公主仁宗皇帝第十女也母曰周貴妃嘉祐五年封慶壽進惠國治平四年進魯國大長公主下嫁吳越忠懿王之曾孫右領軍衛大將軍錢景臻改韓周燕國徽宗朝進秦魏兩國政和三年更封令德景行大長帝姬靖康二年諸帝姬北徙姬以先朝女金人不知留於汴建炎初復公主號改封秦魯國避地南渡賊張遇掠其家中子愕被害公主至揚州朝謁復避地之閩紹興三年自閩至會稽請入見因留居焉後徙台州上以公主行尊年高甚敬之每入內見必先揖靖康中戚里例納節至是公主爲其子忱請還舊官

上以忱爲瀘州節度使仍詔戚里不得援例久之又爲
忱請優賜推恩上重違之加忱開府儀同三司時主有
三子恂愷非已所出故獨厚於忱上戒之曰長主壽考
如此乃仁宗皇帝四十二年深仁厚澤是以鍾慶於長
主長主待遇諸子宜法仁宗用心之均一主感服薨年
八十六上輟朝五日幸其第臨奠詔子孫皆進官一等
謚曰賢穆二十九年加謚明懿

兗國大長公主帝第十一女也嘉祐六年封永壽進榮
國長公主治平四年進祁國大長公主熙寧九年改魯
國下嫁左領軍衛大將軍曹詩主性儉節於池臺苑囿
一無所增飭十年夏旱曹族以主生日將盛具爲壽主
曰上方損膳徹樂吾何心能安悉屏之元豐六年薨年
二十四追封荆國謚賢懿遷其二子曄收皆領團練使
徽宗追封兗國又改賢懿恭穆大長帝姬

燕舒國大長公主帝第十二女也嘉祐六年封寶壽八
年進封順國長公主治平四年進冀國大長公主元豐
五年改魏國下嫁開州團練使郭獻卿八年進楚國徽
宗改吳國進吳越國改秦兗國政和二年薨追封燕舒
國謚懿穆復改懿穆大長帝姬

英宗四女舒國公主早亡

魏楚國大長公主帝長女嘉祐八年封德寧治平三年
進封徐國下嫁左衛將軍王師約四年進陳國長公主
元豐八年薨追封燕國大長公主謚惠和元祐四年追
封秦國徽宗追封魏國加韓魏國改魏楚國又改惠和
大長帝姬

魏國大長公主帝第二女母曰宣仁聖烈皇后嘉祐八
年封寶安公主神宗立進舒國長公主改蜀國下嫁左
衛將軍王洸洸母盧寡居主處之近舍日致膳羞盧病
自和湯劑以進帝厚於姊妹故主第池藥服翫極其華
得主以不得日侍宣仁於寶慈宮居常悒然間遇旱暵

帝降損以禱主亦如之曰我奉賜皆出公上因應同其
休戚帝居慈聖光獻皇后喪毀甚主曰吾與上同體視
此亦復何聊立散遣歌舞三十輩元豐三年病篤主性
不妬忌王洸以是自恣嘗貶官至是帝命還洸官以慰
主意太后臨問已不省后慟哭久稍能言自訴必不起
相持而泣帝繼至自爲診脉親持粥食之主強爲帝盡
食賜金帛六千且同所須但謝復洸官而已明日薨年
三十帝未上食卽駕往望第門而哭輟朝五日追封越
國謚賢惠後進封大長公主累改秦荆魏三國主好讀
古文章喜筆札調恤族黨中外稱賢洸不矜細行至與

妾姦主旁妾數抵戾主薨後乳母訴之帝命窮治杖八
妾以配兵既葬謫詵均州子彥弼生三歲卒

韓魏國大長公主帝第三女與魏國同生始封壽康公
主改祁國衛國下嫁張敦禮進冀國大長公主改秦越
楚國加今封政和三年改賢德懿行帝姬宣和五年薨
神宗十女楚國鄆國潞國邢國邠國兗國六公主皆早
薨

周國長公主帝長女也母曰欽聖憲肅皇后封延禧公
主生而警悟自羈非習嗜宛如成人年十二卒帝后皆
變服哀送追贈燕國元符末改封周國

唐國長公主帝第三女也始封淑壽公主初帝念韓琦
功德欲與爲婚姻故哲宗緣先帝意以主降琦之子嘉
彥歷封溫曹冀雍越燕六國政和元年薨追封唐國長
公主

潭國賢孝長公主帝第四女也母曰宋貴妃始封康國紹
聖四年下嫁王遇歷韓魯陳鄆四國大觀二年薨追加
封謚

徐國長公主帝幼女也母曰欽成皇后始封慶國進益
冀蜀徐四國年及笄猶處聖瑞宮侍母疾晝夜不暫去
藥餌非經手弗以進迨疾革號慟屢絕左右不忍視崇

寧三年下嫁鄭王潘美之曾孫意事姑脩婦道潘故大族夫黨數千百人賓接皆盡禮無裏外言志向冲淡服玩不爲紛華歲時簡嬉遊十年間惟一適西池而已再生子不成而死勝妾得女拊視如已出政和三年改稱柔惠帝姬五年薨年三十一追封賢靜長帝姬

哲宗四女鄧國楊國二公主早亡

陳國公主始封德康公主進瀛國榮國大觀四年下嫁石端禮徙陳國改淑和帝姬政和七年薨

秦國康懿長公主帝第三女也始封康懿進嘉國慶國政和二年改韓國公主出降潘正夫改淑慎帝姬靖康末與賢德懿行大長公主俱以先朝女留于汴建炎初復公主號改封吳國覲上于越以玉管筆小玉山青畫爲獻上溫辭卻之避地至婺州紹興四年入見其子堯卿等五人各進官一等主奏言祖宗以來駙馬都尉石保吉魏咸信柴宗慶皆除使相今正夫歷事四朝在汴京曾建議迎陛下至杭州又言禁衛未集預宜防變乞除開府上不許八年再入見留宮中三日時極暑上每正衣冠對之飲食又爲正夫求恩數上曰官爵豈可私與人況今日多事未暇及此時趙鼎當國方論羣臣紹述之奸頗抑正夫鼎去位正夫始得開府之命給事中

劉一正言其非舊制恐援例者多乃詔哲宗惟正夫爲
近親餘人毋得援例顯仁太后歸主同秦魯國大長公
主迎于道十九年又入朝子長卿粹卿端卿皆自團練
使陞觀察使從所請也孝宗卽位進封秦國大長公主
隆興二年益薨康懿主在日正夫官至少傅封和國公
溫卿寧國軍承宣使長卿寧江軍承宣使端卿昭信軍
承宣使清卿容州觀察使墨卿才卿並帶團練使其盛
如此正夫薨於紹興二十二年贈太傅

徽宗三十四女政和三年改公主號爲帝姬國號易以

美名二字

嘉德帝姬建中靖國元年六月封德慶公主改封嘉福
尋改號帝姬再封嘉德下嫁左衛將軍曹寅

榮德帝姬初封永慶公主改封榮福尋改號帝姬再封

榮德下嫁左衛將軍曹晟

順淑帝姬初封順慶公主薨追謚益國及改帝姬號追

封順淑

安德帝姬初封淑慶公主改封安福尋改號帝姬再封

安德下嫁左衛將軍宋邦光

茂德帝姬初封延慶公主改封康福尋改號帝姬再封

茂德下嫁宣和殿待制蔡偉

壽淑帝姬初封壽慶公主薨追封豫國及改帝姬號追封壽淑

惠淑帝姬初封惠慶公主薨追封鄧國及改帝姬號追封惠淑

安淑帝姬初封安慶公主改封隆福薨追封蜀國及改帝姬號追封安淑

崇德帝姬初封和慶公主改封崇福尋改帝姬號下嫁左衛將軍曹湜再封崇德宣和二年薨

康淑帝姬初封康慶公主改封承福薨追封商國及改帝姬號追封康淑

榮淑帝姬初封崇慶公主改封懿福薨追封蔡國及改帝姬號追封榮淑

保淑帝姬初封保慶公主薨追封魯國及改帝姬號追封保淑

成德帝姬初封昌福公主改號帝姬再封成德下嫁向子房

洵德帝姬初封衍國公主改號帝姬尋改封洵德下嫁田丕

悼穆帝姬初封徽福公主改號帝姬薨追封悼穆

顯德帝姬初封顯福公主改號帝姬尋改封顯德下嫁

劉文彥

熙淑帝姬初封熙福公主薨追封華國及改帝姬追封

熙淑

敦淑帝姬初封壽福公主薨追封涇國及改帝姬追封

敦淑

順德帝姬初封順德公主改號帝姬尋改封順德下嫁

向子展

柔福帝姬初封柔福公主後改帝姬

申福帝姬初封夢追封冲慧

寧福帝姬政和四年封

保福帝姬追封莊懿

賢福帝姬追封冲懿

仁福帝姬追封順穆

和福帝姬

永福帝姬

惠福帝姬

令福帝姬

華福帝姬

慶福帝姬

儀福帝姬

萬曆二十七年刊

純福帝姬

恭福帝姬

右三十四帝姬早亡者十四人餘皆北遷獨恭福
帝姬生纔周睟金人不知故不行建炎三年薨封隋
國公主安德帝姬有遺女一人後適嗣秀王伯圭
封秦國夫人榮德帝姬至燕京駙馬曹晟卒改適
習古國王紹興中有商人妻易氏者在劉超軍中
見內人言宮禁事遂自稱榮德帝姬鎮撫使解潛
送至行在遣內夫人驗之詐付大理寺獄成詔杖
死又有開封尼李靜善者內人言其貌似柔福靜
善卽自稱柔福蘄州兵馬鈐轄韓世清送至行在
遣內侍馮益等驗視遂封福國長公主適永州防
禦使高世榮其後內人從顯仁太后歸言其妄送
法寺治之內侍李愜自北還又言柔福在五國城
適徐還而薨靜善遂伏誅柔福薨在紹興十一年
從梓宮來者以其骨至葬之追封和國長公主
孝宗二女長嘉國公主紹興二十四年封碩人進永嘉
郡主三十二年卒詔以醫官李師克等屬吏孝宗時居
東宮奏臣女幼而多疾不宜罪醫遂寢乾道二年贈嘉
國公主次女生五月而夭未及封

文安郡主光宗長女也次女封和政郡主季女封齊安郡主皆早卒紹熙元年並追贈公主

安康郡主魏惠獻王女也初封永寧郡主改封通義以父遺表遂升安康歸殿前司前軍統領羅忠信子良臣詔王府主管鄧從義諭旨皇女孫郡主宜執婦道務成肅雍之德毋敢或違賜甲第居之良臣以恩轉秉義郎除閤門祇候官開禧元年郡主薨年三十九

祁國公主寧宗女也生六月而薨追封祁國

周漢國公主理宗女也母賈貴妃早薨帝無子

公主生而甚鍾愛初封瑞國公主改昇國開慶初公主年及笄詔議選尚宰臣請用唐太宗下降士人故事欲以進士第一人尚主遂取周震炎廷謝日公主適從屏內窺見意頗不懌帝微知之景定二年四月帝以楊太后擁立功乃選太后姪孫鎮尚主擢鎮右領軍衛將軍駙馬都統進封公主爲周國公主帝欲時時見之乃爲主起第嘉會門飛樓閣道密邇宮苑帝常御小輦從宮人過宮主第特賜董役官減三年磨勘工匠犒賞有差明年進封周漢國公主拜鎮慶遠軍承宣使鎮宗族娣姒皆推官加封寵異甚渥七月主病有烏九首大如箕集主家搗衣石上是夕薨年二十二無子帝哭之甚哀

謚端孝鎮官節度使云

宋史卷二百四十八終

宋史卷二百四十九

列傳第八

開府儀同三司上柱國錄軍國重事前中書右丞相監修國史領經筵事都總裁脫脫

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

范質

子旻

王溥

父祐

魏仁浦

子咸信
孫昭亮

范質字文素大名宗城人父守遇鄭州防禦判官質生之夕母夢神人授以五色筆九歲能屬文十三治尚書教授生徒後唐長興四年舉進士為忠武軍節度推官

萬曆二十七年刊

宋史卷二百四十九

列傳

遷封丘令晉天福中以文章干宰相桑維翰深器之卽
奏爲監察御史及維翰出鎮相州歷泰寧晉昌二節度
皆請質爲從事維翰再相質遷主客員外郎直史館歲
餘召入爲翰林學士加比部郎中知制誥契丹侵邊少
帝命漢祖等十五將出征是夜質入直少帝令召諸學
士分草制質曰宮城已閉恐泄機事獨具草以進辭理
優贍當時稱之漢初加中書舍人戶部侍郎周祖征叛
每朝廷遣使齎詔處分軍事皆合機宜周祖問誰爲此
辭使者以質對歎曰宰相器也周祖自鄴起兵向闕京
城擾亂質匿民間物色得之喜甚時大雪解袍衣之且
令草太后誥及議迎相陰公儀注質蒼黃論撰稱旨迺
白太后以質爲兵部侍郎樞密副使周廣順初加拜中
書侍郎平章事集賢殿大學士翌日兼參知樞密院事
郊祀畢進位左僕射兼門下侍郎平章事監脩國史從
征高平還加司徒弘文館大學士顯德四年夏從征壽
州還加爵邑質建議以律條繁冗輕重無據吏得因緣
爲奸世宗特命詳定是爲刑統六年夏世宗北征質病
留京師賜錢百萬俾市醫藥及平關南至瀛州質見于
路左師還以樞密使魏仁浦爲相命質與王溥並參知
樞密院事世宗不豫入受顧命恭帝嗣位加開府儀同

三司封蕭國公及太祖北征爲六師推戴自陳橋還府署時質方就食閣中太祖入率王溥魏仁浦就府謁見太祖對之嗚咽流涕具言擁逼之狀質等未及對軍校羅彥瓌舉刃擬質曰我輩無主今日須得天子太祖叱彥瓌不退質不知所措乃與溥等降階受命宋初加兼侍中罷參知樞密俄被疾太祖征澤潞幸其第賜黃金器二百兩銀器千兩絹二千匹錢二百萬太祖初卽位庶事謙抑至於藩戚尚未崇建幕府賓佐未列於位質因上奏曰自古帝王開基創業封建子弟樹立磐維宗戚旣隆社稷永固伏見皇弟泰寧軍節度使光義自居戎職特負將材及領藩維尤積時望嘉州防禦使光美雄俊老成脩身樂善嘉譽日聞乞並行封冊申錫命書皇子皇女雖在襁褓者亦乞下有司許行恩制此臣之願也臣又聞爲宰相者當舉賢能以輔佐天子竊以端明殿學士呂餘慶樞密副使趙普精通治道經事霸府歷歲滋深覩其公忠誠堪毗倚乞授以台司俾申才用帝嘉納之先是宰相見天子議大政事必命坐面議之從容賜茶而退唐及五代猶遵此制及質等憚帝英睿每事輒具劄子進呈具言曰如此庶盡稟承之方免妄庸之失帝從之由是奏御浸多始廢坐論之禮乾德初帝

將有事屬丘以質爲大禮使質與鹵簿使張昭儀伏使
劉溫叟討論舊典定南郊行禮圖上之帝尤嘉獎由是
禮文始備質自爲序禮畢進封魯國公質奉表固辭不
允二年正月罷爲太子太傅九月卒年五十四將終戒
其子旻勿請謚勿刻墓碑太祖聞之爲悲惋罷朝贈中
書令賜絹五百匹粟麥各百石質力學強記性明悟舉
進士時和凝以翰林學士典貢部覽質所試文字重之
自以登第名在十三亦以其數處之貢闈中謂之傳衣
鉢其後質登相位爲太子太傅封魯國公皆與凝同云
初質旣登朝循手不釋卷人或勞之質曰有善相者謂
我異日位宰輔誠如其言不學何術以處之後從世宗
征淮南詔令多出其手吳中文士莫不驚伏質每下制
勅未嘗破律命刺史縣令必以戶口版籍爲急朝廷遣
使視民田按獄訟皆延見爲述天子憂勤之意然後遣
之世宗初征淮南駐壽濠銳意攻取且議行幸揚州質
以師老與王溥泣諫乃止及再駕揚州因事怒竇儀罪
在不測質入謁請見世宗意其救儀起避之質趨前曰
儀近臣也過小不當誅因免冠叩頭泣下曰臣備位宰
相豈可使人主暴怒致近臣於死地耶願寬儀罪世宗
意遂解復坐卽遣赦儀質性卞急好面折人以廉介自

持未嘗受四方饋遺前後所得祿賜多給孤遺閭門之中食不異品身沒家無餘貲太祖因論輔相謂侍臣曰朕聞范質止有居第不事生產真宰相也太宗亦嘗稱之曰宰輔中能循規矩慎名器持廉節無出質右者但欠世宗一死爲可惜爾從子校書郎杲求奏遷秩質作詩曉之時人傳誦以爲勸戒有集三十卷又述朱梁至周五代爲通錄六十五卷行于世子旻

旻字貴參十歲能屬文以父任右千年備身太子司議郎累遷著作佐郎宋初爲度支員外郎判大理正事俄知開封縣太宗時領京尹數召與語頗器重之嶺南平

遷知邕州兼水陸轉運使俗好淫祀輕醫藥重鬼神旻下令禁之且割已奉幣藥以給病者愈者千計復以方書刻石置廳壁民感化之會南漢知廣州官鄧存忠劫土人二萬衆攻州城七十餘日旻屢出親戰矢集於胸猶激勵將卒殊死戰賊遂少却病創日篤堅壁固守遣使十五輩求援廣州救兵至圍解賜璽書獎之旻病甚詔令有司以肩輿載歸闕下疾愈通判鎮州有能聲賜錢二百萬遷庫部員外郎開寶九年知淮南轉運事太祖謂旻曰朕今委卿以方面之重凡除民隱急軍須之務悉以便宜從事無庸一一中覆也歲運米百餘萬石

給京師當時稱有心計太平興國初召爲水部郎中錢
俶獻地以旻爲考功郎中權知兩浙諸州軍事旻上言
俶在國日徭賦繁苛凡薪粒蔬菓箕帚之屬悉收算欲
盡釋不取以蠲其弊從之車駕征晉陽上書求從召爲
右諫議大夫三司副使判行在三司又兼吏部選事師
還加給事中坐受人請求擅示竹木入官爲王仁瞻所
發貶房州司戶語在仁瞻傳量移唐州六年卒年四十
六有集一十卷邕管記三卷其後子貽孫上言詔復舊
官貽孫官至主客員外郎

果字師回父正青州從事果少孤質視如已子刻志於

學與姑臧李均汾陽郭昱齊名爲文深僻難曉後生多
慕效之以蔭補太廟齋郎再遷國子四門博上嘗携文
謁陶穀竇儀咸大稱賞謂果曰若舉進士當待汝以甲
科及秋試有上書言伐閱之家不當與寒士爭科第果
遂不應舉稍遷著作佐郎出爲許鄧二州從事坐事免
太平興國初遷著作郎直史歷右拾遺左補闕雍熙
二年同知貢舉俄上書自言其才比東方朔未顯用以
觀其效太宗壯之擢知制誥果家貧貸人錢數百萬母
兄晞性嗇嘗爲興元少尹居京兆殖貨鉅萬親故有自
長安來者給果曰少尹不復靳財物已揮金無算矣果

聞之喜因上言兄老求典京兆以便養太宗從其請改
工部郎中罷知制誥杲既至而晞咨如故且常以不法
事干公府杲大悔杲視事踰年境內不治會賊帥劉渥
剽掠屬縣史卒解散遂驚悸成疾移知壽州上言家世
史官願秉直筆成國朝大典召爲史館脩撰固求掌誥
詞帝從之時翰林學士宋曰左遷鄜州賈黃中李沆參
知政事蘇易簡轉承旨杲連致書相府求爲學士且言
於宰相李昉曰先公嘗授以制誥一編謂杲才堪此職
因出示昉昉屢開解之未幾太宗飛白書玉堂額以賜
翰林杲又上玉堂記因請備職太宗惡其躁競改右諫
議大夫知濠州復召爲史館脩撰初太宗以太祖朝典
策未備乃議召杲杲聞命喜甚以爲將加優擢晨夜趨
進至宋州遇朗州通判錢熙杲問以朝議將任僕何官
熙言重脩太祖實錄爾杲默然久之感疾至京師旬月
卒年五十六太宗閱之錄其二子杲性虛誕與人交好
面譽背非惟與柳開善更相引重始終無間不善治生
家益貧杲端坐終日不知計所出人皆笑之子坦亦登
進士第

王溥字齊物并州祁人父祚爲郡小吏有心計從晉祖
入洛掌鹽鐵案以母老解職歸漢祖鎮并門統行營兵

拒契丹委祚經度芻粟卽位擢爲三司副使歷周爲隨州刺史漢法禁牛革輦送京師遇暑雨多腐壞祚請班鎧甲之式於諸州令裁之以輸民甚便之移刺商州以奉錢募人開大秦山岩梯路行旅感其惠顯德初置華州節度以祚爲刺史未幾改鎮潁州均部內租稅補實流徙以出舊籍州境舊有通商渠距淮三百里歲久湮塞祚疏導之遂通舟楫郡無水患歷鄭州團練使宋初升宿州爲防禦以祚爲使課民鑿井脩火備築城北隄以禦水災因求致政至闕下拜左領軍衛上將軍致仕

溥漢乾祐中舉進士甲科爲秘書郎時李守貞據河中

趙思綰反京兆王景崇反鳳翔周祖將兵討之辟溥爲從事河中平得賊中文書多朝貴及藩鎮相交結語周祖籍其名將按之溥諫曰魑魅之形伺夜而出日月旣照氛沴自消願一切焚之以安反側周祖從之師還遷太常丞從周祖鎮鄴廣順初授左諫議大夫樞密直學士二年遷中書舍人翰林學士三年加戶部侍郎改端明殿學士周祖疾革召學士草制以溥爲中書侍郎平章事宣制畢周祖曰吾無憂矣卽日崩世宗將親征澤潞馮道力諫止溥獨贊成之凱還加兼禮部尚書監脩國史世宗嘗從容問溥曰漢相李崧以蠟書與契丹猶

有記其詞者信有之耶溥曰崧爲大臣設有此謀肯輕示外人蓋蘇逢吉誣之耳世宗始悟詔贈其官世宗將討秦鳳求帥於溥溥薦向拱事平世宗因宴酌酒賜溥曰爲吾擇帥成邊功者卿也從平壽春制加階爵顯德四年丁外艱起復表四上乞終喪世宗大怒宰相范質奏解之溥懼入謝六年夏命參知樞密院事恭帝嗣位加右僕射是冬表請脩世宗實錄遂奏史館脩撰都官郎中知制誥扈蒙右司員外郎知制誥張淡左拾遺王格直史館左拾遺董淳同加脩纂從之宋初進位司空罷參知樞密院乾德二年罷爲太子太保舊制一品班於臺省之後太祖因見溥謂左右曰溥舊相當寵異之卽今分臺省班於東西遂爲定制五年丁內艱服闋加太子太傅開寶二年遷太子太師中謝曰太祖顧左右曰溥十年作相三遷一品福履之盛近世未見其比太平興國初封祁國公七年八月卒年六十一輟朝二日贈侍中謚文獻溥性寬厚美風度好汲引後進其所薦至顯位者甚衆頗吝嗇祚頻領牧守能殖貨所至有田宅家累萬金溥在相位祚以宿州防禦使家居每公卿至必首謁祚置酒上壽溥朝服趨侍左右坐客不安席輒引避祚曰此豚犬尔勿煩諸君起溥諷祚求致政祚意

朝廷未之許也既得請祚大罵溥曰我筋力未衰汝欲自固名位而幽囚我舉大挺將擊之親戚勸諭乃止溥好學手不釋卷嘗集蘇冕會要及崔鉉續會要補其漏爲百卷曰唐會要又采朱梁至周爲三十卷曰五代會要有集二十卷子貽孫貽正貽慶貽序貽正至國子博士貽慶比部郎中貽序景德二年進士後改名貽矩至司封員外郎貽正子克明尚太宗女鄭國長公主改名貽永令與其父同行見外戚傳貽孫字象賢少隨周祖典商穎二州署衙內都指揮使顯德中以父在中書改朝散大夫著作佐郎宋初遷金部員外郎賜紫累遷

右司郎中淳化中卒太祖平吳蜀所獲文史副本分賜大臣溥好聚書至萬餘卷貽孫遍覽之又多藏法書名畫太祖嘗問趙普拜禮何以男子跪而婦人否普問禮官不能對貽孫曰古詩云長跪問故夫是婦人亦跪也唐太后朝婦人始拜而不跪普問所出對云大和中有幽州從事張建章著渤海國記備言其事普大稱賞之端拱中右僕射李昉求郡省百官集議舊儀貽孫具以對事見禮志時論許其諳練云

魏仁浦字道濟衛州汲人幼孤貧母爲假黃縑製暑服仁浦年十三嘆曰爲人子不克供養乃使慈母求貸以

衣我我能安乎因慷慨泣下辭母詣洛陽濟河沉衣中
流誓曰不貴達不復渡此晉末隸樞密院爲小史任職
端謹儕輩不能及契丹入中原仁浦隨衆北遷會契丹
主殂于真定仁浦得脫歸魏帥杜重威素知仁浦謹厚
善書計欲留補牙職仁浦以重威降將不願事之遂遁
去重威遣騎追之不及漢祖起太原次鞏縣仁浦迎謁
道左卽補舊職時周祖掌樞密召仁浦問闕下兵數仁
浦悉能記之手疏六萬人周祖喜曰天下事不足憂也
遷兵房主事從周祖鎮鄴乾祐末隱帝用武德使李穀
等謀誅大臣楊邠史弘肇等密詔澶帥李洪義殺騎將

王殷令郭崇韜周祖洪義知事不濟與殷謀遣副使陳
光穗齎詔示周祖周祖懼召仁浦入計且示以詔曰朝
廷將殺我我死不懼獨不念麾下將士乎仁浦曰侍中
握強兵臨重鎮有功朝廷君上信纔圖害忠良雖欲割
心自明奚可得也事將奈何今詔始下外無知者莫若
易詔以盡誅將士爲名激其怒心非徒自免亦可爲揚
史雪寃周祖納其言倒用留守卽易詔書以示諸將衆
懼且怒遂長驅渡河及卽位以仁浦爲樞密副承旨俄
遷右羽林將軍克承旨周祖嘗問仁浦諸州屯兵之數
及將校名氏令檢簿視之仁浦曰臣能記之遂手疏於

紙校簿無差周祖尤倚重焉廣順末太原劉崇寇晉州
仁浦居母喪而宅邇宮城周祖步登寬仁門密遣小黃
門召仁浦計事明日起復舊職周祖大漸謂世宗曰李
洪義長與節鎮魏仁浦無遺違禁密世宗卽位授右監
門衛大將軍樞密副使從征高平周師不利東偏己潰
仁浦勸世宗出陣西殊死戰遂克之師還拜檢校太保
樞密使故事惟宰相生辰賜器幣鞍馬世宗特以賜仁
浦從平壽春加檢校太傅進爵邑遷中書侍郎平章事
集賢殿大學士兼樞密使世宗欲命仁浦爲相議者以
其不由科第世宗曰古人爲宰相者豈_田科第耶遂決
意用之恭帝嗣位加刑部尚書宋初進位右僕射以疾
在告太祖幸其第賜黃金器二百兩錢二百萬再上表
乞骸骨不許乾德初罷守本官開寶二年春宴太祖笑
謂仁浦曰何不勸我一杯酒仁浦奉觴上壽帝密謂之
曰朕欲親征太原如何仁浦曰欲速不達惟陛下慎之
宴罷就第復賜上尊酒十石御膳羊百口從征太原中
途遇疾還至梁侯驛卒年五十九贈侍中仁浦性寬厚
接士大夫有禮務以德報怨漢乾祐中有鄭元昭者開
封浚儀人爲安邑解縣兩池榷鹽使遷解州刺史會詔
以仁浦婦翁李溫玉爲榷鹽使管兩池元昭不得專其

利仁浦方爲樞密院主事元昭意仁浦必庇溫玉會李
守真以河中叛溫玉子在城中元昭卽繫溫玉以變聞
時周祖總樞務知其有間置而不問顯德中仁浦爲樞
密使元昭不自安及代歸闕道洛都以情告仁浦弟仁
滌仁滌曰公第去可無憂我兄素寬仁有度雖公事不
欲傷於人豈念私隙乎元昭至京師仁溥果不介意白
周祖授元昭慶州刺史漢隱帝寵作坊使賈延徽延徽
與仁浦並居欲併其第屢譖仁浦幾至不測及周祖入
汴有擒延徽授仁浦者仁浦謝曰因兵戈以報怨不忍
爲也力保全之當時稱其長者世宗朝近侍有忤上至

死者仁浦力救之全活者衆淮南之役獲賊兵數千人
仁浦從容上言俾隸諸軍軍中無濫殺者景德四年其
子咸信請謚曰宣懿子咸美咸熙咸信咸美以左司禦
率府率致仕咸熙性仁孝嘗會賓客家童數輩覆按碎
器客皆驚愕咸熙色不變止令更設饌具其寬厚若此
以父任累遷屯田郎中後至太僕少卿卒年四十九子
昭慶駕部員外郎昭文西染院使昭素供奉官閣門祇
候

咸信字國寶建隆初授朝散大夫太子右坊通事舍人
改供奉官初太祖在潛邸昭憲太后嘗至仁浦第咸信

方幼侍母側儼如成人太后竒之欲結姻好開寶中太宗尹京成昭憲之意延見咸信於便殿命與御帶党進等較射稱善遂選尚永慶公主授右衛將軍駙馬都尉踰年出領吉州刺史太平興國初真拜本州防禦使四年詔用奉外賜錢十萬五年坐遣親吏市木西邊矯制免所過稅算罰一季奉俄遷慎州觀察使雍熙三年冬契丹擾邊王師出討悉命諸主壻鎮要地王承衍知大名石保吉知河陽咸信知澶州四年本郡黃河清咸信以聞詔褒答之籍田畢就拜彰德軍節度八月遣歸治所淳化四年河決澶淵陷北城再命知州事太宗親諭方略傳置而往時遣閻承翰脩河橋咸信請及流水春下造船爲便承翰入奏方冬難成請權罷其役咸信因其去乃集工成之奏至上大悅河平遣還役兵俄詔留乘隄咸信以爲天寒地涸無決溢之患復奏罷之真宗卽位改定國軍節度咸平中大閱東郊以爲舊城內都巡檢車駕北征爲貝冀路行營都統署詔督師至貝州敵人退召還行在所景德初從幸澶州石保吉與李繼隆爲排陣使契丹請和帝置酒行宮面賞繼隆保吉咸信避席自愧無功上笑而撫慰之二年改武成軍節度知曹州秋霖積潦咸信決廣濟河隄以導之民田無害

扈駕朝陵還上言先墳在洛欲立碑求涖盟津以便其
事卽改知河陽大中祥符初從東封加檢校太尉將祀
汾陰命知澶州令入內副都知張繼能諭旨移領忠武
軍節度未幾召還年已昏眊見上希旨求寵渥七年表
乞任用上出示中書向敏中曰咸信聯榮戚里位居節
制復何望耶是冬以新建南京獎太祖舊臣加同平章
事俄判天雄軍天禧初改陝州大都督府長史保平軍
節度有感風疾苦歸真宗嘗謂宰相曰咸信老病諸子
不克承順身後復能保守其家業耶未幾卒年六十九
贈中書令錄其諸子孫姪遷官者七人咸信頗知書善

待士然性吝喜利仁浦所營邸舍悉擅有之旣卒爲諸
姪所訟時人恥之子昭易昭亮昭侃昭易西京作坊使
知隰州昭侃改名昭昶爲崇儀使

昭亮字克明公主所生幼未名太宗召入禁中命賦賞
花詩詩成上之太宗大悅酌以上尊酒命筆題從訓昭
亮二名令自擇之拜如京副使遷如京洛苑使掌翰林
司丁公主憂起復授六宅使領富州刺史遷內藏庫副
使未幾拜西上閣門使進秩東上上言閣門舊儀制未
當乃詔龍圖閣學士陳彭年待制張知白引進使白文
肇與昭亮同加詳定旣成賜白金千兩又建議設儀石

於內殿加領恩州團練使時咸信在大名屬生日命昭亮就賜禮物是日告命至軍府榮之父卒遷四方館使仍兼掌客省多糾羣官之失儀者昭亮多病在告詔給其奉天禧二年卒昭亮未死日數遣人入謁求進用加兼端州防禦使未及拜命死仍以制書賜其家贈貝州觀察使以弟昭侃爲供備庫使子餘慶爲內殿崇班昭亮與陳彭年款昵彭年嘗稱其才昭亮居官務儉察多遣人偵伺僚輩樞密承旨尹德潤嘗少之會閣門副使焦守節內殿崇班郭盛以役卒與德潤治第昭亮廉知發其事皆坐黜削李維卽王曾妻之叔父同在翰林會受詔試舉人以家事屬維昭亮意曾受所請奏其竊語遣中使參問無他狀曾始得釋昭亮陰險多此類時人惡之餘慶改名成德爲供備庫副使

贊曰五季至周之世宗天下將定之時也范質王溥魏仁浦世宗之所拔擢而皆有宰相之器焉宋祖受命遂爲佐令元臣天之所置果非人之所能測歟質以儒者曉暢軍事及其爲相廉慎守法溥刀筆家子而好學終始不倦仁浦嘗爲小史而與溥皆以寬厚長者著稱豈非絕人之資乎質臨終戒其後勿請謚立碑自悔深矣太宗評質惜其欠世宗一死嗚呼春秋之法責備賢者

質可得免乎

宋史卷二百四十九終

宋史卷二百五十

列傳第九

開府儀同三司在國錄軍國重事前中書方和監修國史領經筵事都

皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

石守信

子保興保吉孫元孫

王審琦

子承衍承衍孫克臣等

高懷德

韓重贇

子崇訓崇業

張令鐸

羅彥瓌

王彥昇

石守信開封浚儀人事周祖得隸帳下廣順初累遷親

萬曆二十七年刊

宋史卷二百五十

列傳

衛都虞候從世宗征晉陽遇敵高平力戰遷親衛左第一軍都校師還遷鐵騎左右都校從征淮南爲先鋒下六合入渦口克楊州遂領嘉州防禦使克鐵騎控鶴四廂都指揮使從征關南爲陸路副都部署以功遷殿前都虞候轉都指揮使領洪州防禦使恭帝卽位加領義成軍節度太祖卽位遷侍衛馬步軍副都指揮使改領歸德軍節度李筠叛守信與向懷德率前軍進討破筠衆于長平斬首三千級又敗其衆三萬于澤州獲僞河陽節度范守圖降太原援軍數千皆殺之澤潞平以功加同平章事李重進反揚州以守信爲行營都部署兼知揚州行府事帝親征至大儀頓守信馳奏城破在朝夕大駕親臨一鼓可平帝亟赴之果克其城建隆二年移鎮鄆州兼侍衛親軍馬步軍都指揮使詔賜本州宅一區乾德初帝因晚朝與守信等飲酒酒酣帝曰我非爾曹不及此然吾爲天子殊不若爲節度使之樂吾終夕未嘗安枕而卧守信等頓首曰今天命已定誰復敢有異心陛下何爲出此言耶帝曰人孰不欲富貴一旦有以黃袍加汝之身雖欲不爲其可得乎守信等謝曰臣愚不及此惟陛下哀矜之帝曰人生駒過隙爾不如多積金帛田宅以遺子孫歌兒舞女以終天年君臣之

間無所猜嫌不亦善乎守信謝曰陛下念及此所謂生
死而肉骨也明日皆稱病乞解兵權帝從之皆以散官
就第賞賚甚厚已而太祖欲使符彥卿管軍趙普屢諫
以爲彥卿名位已盛不可復委以兵權太祖不從宣已
出普復懷之太祖迎謂之曰豈非符彥卿事耶對曰非
也因奏他事旣罷乃出彥卿宣進之太祖曰果然宣何
以復在卿所普曰臣託以處分之語有侏儻者復留之
惟陛下深思利害勿復悔太祖曰卿苦疑彥卿何也朕
待彥卿厚彥卿豈負朕耶普對曰陛下何以能負周世
宗太祖默然事遂中止開寶六年秋加守信兼侍中太

平興國初加兼中書令二年拜中書令行河南尹克西
京留守三年加檢校太師四年從征范陽督前軍失律
責授崇信軍節度兼中書令俄進封衛國公七年徙鎮
陳州復守中書令九年卒年五十七贈尚書令追封威
武郡王謚武烈守信累任節鎮專務聚斂積財鉅萬尤
信奉釋氏在西京建崇德寺募民輦瓦木驅迫甚急而
傭直不給人多苦之子保興保吉

保興字光裔本名保正太祖取興宗之義改之建隆初
年十四以蔭補供奉官明年遷尚食副使太祖嘗召功
臣子弟詢以時事保興年最少應對明白太祖竒之拜

如京使開寶中領順州刺史太宗征河東爲御砦四面
都巡檢太平興國八年出爲高陽關監軍守信卒起復
領本州團練使雍熙初契丹擾邊與戴興楊守一並爲
澶州前軍駐泊李繼遷入鈔徙銀夏綏府都巡檢使嘗
巡按罨子砦並黑水河趣谷中夏人知之以數千騎據
險渡河求戰保興所部不滿二千人乃分短兵伏於河
澣俟其半渡急擊之斬首百餘級追北數十里優詔褒
美端拱中知平戎軍徙莫州俄爲西京都巡檢使淳化
五年真拜蘄州團練使爲永興軍鈐轄改夏綏麟府州
鈐轄至道二年徙延州都巡檢使兼署州事改本路副
都部署與范重召等五路討賊有岌伽羅賦數族率衆
來拒保興選敢死士數百人銜枚夜擊殲之自是吳移
越移諸族歸降還至烏白池賊又爲方陣來拒保興麾
衆出入陣中會乘馬中流矢挺身持滿易騎奮呼且行
且鬪凡三日四十二戰賊遂引去咸平二年知威虜軍
會夏人入鈔保興發官帑錢數萬緡分給戰士主者固
執不可保興曰城危如此安暇中覆事定覆而不允願
以家財償之夏人退驛置以聞真宗貸而不問三年就
拜棣州防禦使徙知邢州改澶州在郡頗峻刑罰每捶
人令緩施其杖移晷方畢五年以疾求歸京師未幾卒

年五十八子元孫保興世豪貴累財鉅萬悉爲季弟保從之子所廢

保吉字祐之初以蔭補天平軍衙內都指揮使開寶四年召見賜襲衣玉帶金鞍勒馬選尚太祖第二女延慶公主拜左衛將軍駙馬都尉俄領愛州刺史太平興國初遷本州防禦使五年坐遣親吏市竹木秦隴間矯制渡關爲王仁贍所發罰一季奉七年改朔州觀察使守信卒起復爲威塞軍節度雍熙三年出知河陽四年召入復命知大名府兼兵馬都部署建改橫海安國二鎮節度真宗卽位加檢校太尉保平軍節度車駕北巡命

爲河北諸路行營都部署屯定州景德初改武寧軍節度同平章事冬幸澶淵命與李繼隆分爲駕前東西兩都排陣使軍于北門外遼騎數萬驟至城下保吉不介馬而馳當其鋒遼人引去俄而請盟錫宴射於行宮後苑帝謂繼隆等曰自古北邊爲患今其畏威服義息戰安民卿等力也保吉進曰臣受命禦患上稟成算至於布列行陣指授方畧皆出於繼隆繼隆曰宣力用心躬率將士臣不及保吉帝曰卿等協和共致太平軍旅之事朕復何憂歡甚賜以襲衣金帶鞍勒馬二年改鎮安軍節度未幾自治所來朝願奉朝請從之四年部民上

治狀乞還鎮所詔獎諭之仍從其請大中祥符初從東封攝司徒封祀壇奉俎加檢校太師還鎮冬公主疾詔歸視主薨明年保吉卒年五十七贈中書令謚莊武保吉姿貌瓌碩頗有武幹累世將相家多財所在有邸舍別墅雖饌品亦飾以綵績好治生射利性尤驕倨所至峻暴好殺待屬吏不以禮鎮大名也葉齊查道皆知名士嘗械以運糧初程能爲京西轉運保吉託治其私負能不從至是其子宿爲屬邑吏將辱之會有辟召乃止又染家貸錢息不盡入質其女其父上訴真宗亟命遣還嘗有僕侵盜私積不時求對懇請配隸帝曰是有常法不可保吉請不已帝戒勗之善弋獵畜鷲禽獸數百令官健羅鳥雀飼之人有規勸者輒怒之在陳州盛飾廨舍以迓貴主因完葺城壘疏牖于上以瞰衢路如箭窓狀未嘗上聞賓佐諫之不聽頗涉衆議初守信鎮陳五十七年卒及保吉繼是鎮壽亦止是談者異之保吉子貽孫任崇儀使帶御器械坐事免官孝孫西京左藏庫使

元孫字善良始名慶孫避章獻太后祖諱易之以守信蔭爲東頭供奉官閣門祇候累遷如京副使仁宗卽位改文思副使勾當法酒庫吏盜酒坐失察追二官復如

京副使爲澶州巡檢徙知莫州有治迹以禮賓使再任
又徙保州領廉州刺史兼廣信安肅軍緣邊都巡檢時
開屯田鑿塘水有訟元孫擅汚民田者遣官按視訟者
以誣服卽賜白金五百兩詔褒諭之再遷西上閣門使
并代州兵馬鈐轄歷侍衛親軍步軍殿前都虞候鄜延
副都總管緣邊安撫使遷邕州觀察使康定初夏人寇
延州元孫與戰于三州口軍敗見執傳者以爲已死贈
中正軍節度使兼大傅錄其子孫七人及元昊納款縱
元孫歸諫官御史奏元孫軍敗不死辱國請斬塞下賈昌朝獨言曰在春秋時晉獲楚將欒叔臣楚獲晉將知罃
亦還其國不誅因入對探袖出魏志于禁傳以奏曰前
代將臣敗覆而還多不加罪帝乃貸元孫安置全州以
升耐赦內徙襄州侍御史劉湜言元孫失軍辱命朝廷
貸而不誅若例從量移無以勸用命之士元孫遂不徙
後徙許州還京師卒

王審琦字仲寶其先遼西人後徙家洛陽漢乾祐初隸
周祖帳下性純謹甚親任之從平李守貞以功署廳直
左番副將廣順中歷東西班行首內殿直都知鐵騎指
揮使從世宗征劉崇力戰有功遷東西班都虞候改鐵
騎都虞候轉本軍右第二軍都校世宗召禁軍諸校宴

射苑中審琦連中的世宗嘉之賞賚有加俄領勤州刺史親征淮南舒州堅壁未下詔以郭令圖領刺史命審琦及司超以精騎攻其城一夕拔之擒其刺史獲鎧仗軍儲數十萬計令圖既入城審琦等遂救黃州數日令圖爲舒人所逐審琦選輕騎銜枚夜發信宿至城下大敗舒人令圖得復還治所世宗嘉之授散員都指揮使又破南唐軍于紫金山先登中流矢轉控鶴右廂都校領虔州團練使世宗圍濠州審琦率敢死士數千人拔其水砦奪月城濠州遂降及攻楚州爲南面巡檢城將陷審琦意淮人必遁設伏待之少頃城中兵果鑿南門而潰伏兵擊之斬數千級繫五千餘人獻于行在賜名馬玉帶錦綵數百匹淮南平改鐵騎右廂都校又從平瓦橋關恭帝卽位遷殿前都虞候領睦州防禦使宋初擢爲殿前都指揮使領泰寧軍節度從征李筠爲御營前洞屋都部署爲飛石所傷車駕臨視澤路平改領武成軍節度李重進叛副石守信爲前軍部署討之建隆二年出爲中正軍節度在鎮八年爲政寬簡所部邑令以罪停其錄事吏幕僚白令不先咨府請按之審琦曰五代以來諸侯強橫令宰不得專縣事今天下治平我忝守藩維而部內宰能斥去黠吏誠可嘉爾何按之有

聞者歎服開寶二年從征太原爲御營四面都巡檢三年改鎮許州賜甲第留京師太祖嘗召審琦宴射苑中連中的賜御馬黃金鞍勒六年與高懷德並加同平章事七年卒年五十初審琦暴疾不能語帝親臨視及卒又幸其第哭之慟賜中書令追封琅琊郡王賻贈加等葬日又爲廢朝審琦重厚有方略尤善騎射鎮壽春歲得租課量入爲出未嘗有所誅求素不能飲嘗侍宴太祖酒酣仰祝曰酒天之美祿審琦朕布衣交也方與朕共享富貴何靳之不令飲邪祝畢顧謂審琦曰天必賜卿酒量試飲之勿憚也審琦受詔飲十杯無苦自此侍宴常引滿及歸私家卽不能飲或強飲輒病子承衍承衍承德承祐承俊承僎承僎承僅承休承德西上閣門使會州刺史承祐至如京使承俊承僎至內殿崇班承僎至閣門祇候承僅至左神武將軍致仕承休至內殿承制

承衍字希甫幼端謹審琦鎮兗海壽春皆署以牙職開寶初補內殿供奉官都知三年尚太祖女昭慶公主授右衛將軍駙馬都尉仍克都知踰年領恩州刺史加本州防禦使太平興國初遷應州觀察使二年春太宗幸其第賜宴承衍以金器名馬爲壽詔賜銀萬兩錦綵五

千匹三年加檢校太保坐市竹木秦隴矯制免稅算罰
一季奉七年授彰國軍節度雍熙中出知天雄軍府兼
都部署時契丹擾鎮陽侯騎至冀州去魏二百餘里鄰
境戒嚴城中大恐屬上元節承衍下令市中及佛寺然
燈設樂與賓佐宴遊達旦人頗以安明年召還復爲貝
冀都部署端拱初換永清軍節度再知天雄軍吏民千
餘詣監軍請爲本道節帥詔褒之真宗卽位改河中尹
護國軍節度加檢校太尉咸平六年以疾求罷節鉞三
抗表不許帝自臨問至卧內慰勉久之賜予甚厚擇尚
醫數人迭宿其第卒年五十二車駕親臨贈中書

鹵簿葬謚恭肅其後公主請置守冢五戶從之承衍善
騎射曉音律頗涉學藝好吟咏以功臣子尚主貴顯擁
富貲自奉甚厚子世安世隆世雄世融世安至崇儀副
使通事舍人世隆字本支以公主子爲如京副使歷洛
苑六宅二使領平州刺史性驕恣每坐諸叔之上人皆
嗤之景德初卒特贈泰州防禦使召見其三子賜名克
基克緒克忠皆面授供奉官世雄至內殿崇班世融爲
內殿承制世安子克正殿中丞克基克忠並爲西染院
副使兼閣門通事舍人克緒至內殿承制世隆幼子克
明爲西上閣門副使

承衍字希悅開寶中授開廐使面賜紫袍金帶纔十二
歲太平興國中出監徐州軍又爲西京水南巡檢使改
如京使表求治郡自效命知潭州遷六宅使領昭州刺
史俄知澶州加莊宅使咸平中兩賜川峽傳詔慰撫官
吏經畧蠻洞連知延代并三州皆兼兵馬鈐轄改尚食
使鳳翔張雍病命承衍代之徙涇州授西上閣門使改
領永州刺史景德中真宗以天水近邊蕃漢雜處擇守
臣撫治擢承衍知秦州徙知天雄軍大中祥符初進秩
東上閣門使承衍病足在大名不能騎政多廢弛及代
賜告家居表求解職不允以久不朝請求近郡改左武
衛大將軍知壽州二年卒年四十九詔遣其弟承傑馳
往護喪承衍頗涉學喜爲詩所至爲一集曉音律多與
士大夫遊意豁如也初審琦鎮壽春承衍生于郡解至
卒亦於其地人咸異之子世京爲閣門祇候世文內殿
崇班

克臣字子難祖承衍尚秦國賢穆公主克臣第景祐進
士仁宗闕其文顧侍臣曰賢穆有孫登科可喜也仕累
通判壽州鼓角卒夜入州廨擊郡將旣就擒而監兵使
所部被甲操刃立庭中官吏駭觀克臣徐言曰此不過
爲盜耳立遣甲者去戒兇卒勿妄引他人衆謹服是日

天貺節率掾屬朝謁如常儀人賴以安猶坐貶監潭州
稅熙寧中爲開封度支二判官遷鹽鐵副使時鄭俠以
上書竄嶺表克臣嘗薦俠且餽之白金又坐奪官復爲
戶部副使以集賢殿脩撰知鄆州京東多盜克臣請以
便宜處決遂下諸郡使械送尤桀者斬以徇盜爲少襄
河決曹村克臣亟築隄城下或曰河決澶淵去鄆爲遠
且州徙於高八十年不知有水患安事此克臣不聽役
愈急隄成水大至不沒者才尺餘復起甬道屬之東平
王陵埽人得趨以避水事寧皆繪像祀之進天章閣待
制徙知瀛州有告外間入境密旨趣具獄株連甚衆克
臣陰緩之已而得爲問者於他道徙知太原王中正西
討罔功而誣克臣姑息士卒使無固志黜爲單州明年
拜工部侍郎至是神宗幸尚書省至部舍止輦獎其治
力以爲雖少者不及顧其子駙馬都尉師約使人覲元
祐四年以龍圖閣直學士太中大夫卒年七十六
師約字君授少習進士業英宗欲求儒生爲主壻命宰
相召克臣諭旨令師約持所爲文至第明日獻賦一編
卽坐中賦大人繼明詩遂賜對選爲駙馬都尉尚徐國
公主授左衛將軍面賜玉帶又賜九經筆硯勉之進學
神宗卽位拜嘉州刺史遷成州團練使國朝故事主壻

未嘗居職帝始令師約同管當三班院試其才明年主就館乃罷遷汝州防禦使始制駙馬都尉七年考績法轉晉州觀察使哲宗立遷鎮安軍節度觀察留後宣仁后臨朝師約屢上書言事元符初議者以爲職不當上言褫其秩徽宗卽位乃復保平軍留後又爲樞密都承旨未幾復罷崇寧元年卒年五十九師約善射嘗陪遼使燕射玉津園一發中鵠發必破的屢受金帶及鞍勒馬之賜子殊主所生至閬州觀察使

高懷德字藏用真定常山人周天平節度齊王行周之子懷德忠厚倜儻有武勇行周歷延路二鎮及留守洛都節制宋亳皆署以牙職晉開運初遼人侵邊以行周爲北面前軍都部署懷德始冠白行周願從北征行周壯之許其行至戚城遇遼軍被圍數重援兵不至危甚懷德左右射縱橫馳突衆皆披靡挾父而出以功領羅州刺史賜玳瑁寶帶名馬以寵異之及行周移鎮鄆州改集州刺史仍領牙校又遷信州刺史從行周再鎮宋州晉末契丹南侵以行周爲邢趙路都部署禦之留懷德守睢陽會杜重威降契丹京東諸州羣盜大起懷德堅壁清野敵不能入行周率兵歸鎮敵遂解去漢初行周移鎮魏博及再領天平以懷德爲忠州刺史領職如

故周祖征慕容彥超還過汶上寵賜行周甚厚并賜懷德衣帶綵繪鞍勒馬行周卒召懷德爲東西班都指揮使領吉州刺史改鐵騎都指揮使太原劉崇入寇世宗討之以懷德爲先鋒都虞候高平克捷以功遷鐵騎右廂都指揮使領果州團練使從征淮南知廬州行府事克招安使戰廬州城下斬首七百餘級尋遷龍捷左廂都指揮使領岳州防禦使賜駿馬七匹南唐將劉仁贍據壽春舒元據紫金山置連珠砦爲援以抗周師世宗命懷德率帳下親信數十騎覘其營壘懷德夜涉淮遲明賊始覺來戰懷德以少擊衆擒其裨將以還盡偵知其形勢強弱以白世宗世宗大喜賜襲衣金帶器幣銀鞍勒馬世宗一日因按轡淮壩以觀賊勢見一將追擊賊衆奪槩以還令左右問之乃懷德也召至行在慰勞許以節鉞世宗北征命與韓通率兵先抵滄州初得關南又命副陳思讓爲雄州兵馬都部署克瓦橋關降姚內斌以歸恭帝嗣位擢爲侍衛馬軍都指揮使領江寧軍節度又爲北面行營馬軍都指揮使太祖卽位拜殿前副都點檢移鎮滑州克關南副都部署尚宣祖女燕國長公主加駙馬都尉李筠叛上黨帝將親征先令懷德率所部與石守信進攻破筠衆於澤州南事平以功

遷忠武軍節度檢校太尉從平揚州建隆二年改歸德
軍節度開寶六年秋加同平章事冬長公主薨去駙馬
都尉號太宗卽位加兼侍中又加檢校太師太平興國
三年春被病詔太醫王元祐道士馬志就第療之四年
從平太原改鎮曹州封冀國公七年改武勝軍節度是
年七月卒年五十七贈中書令追封渤海郡王謚武穆
懷德將家子練習戎事不喜讀書性簡率不拘小節善
音律自爲新聲度曲極精妙好射獵嘗三五日露宿野
次獲狐兔累數百或對客不揖而起由別門引數十騎
縱禽於郊子處恭歷莊宅使至右監門衛大將軍致仕
處俊至西京作坊使

韓重贇磁州武安人少以武勇隸周太祖麾下廣順初
補左班殿直副都知從世宗戰高平以功遷鐵騎指揮
使從征淮南先登中流矢轉都虞候俄遷控鶴軍都指
揮使領虔州刺史宋初以翊戴功擢爲龍捷左廂都校
領永州防禦使從征澤潞還命代張光翰爲侍衛馬步
軍都指揮使領江寧軍節度討李重進爲行營馬步軍
都虞候建隆二年改殿前都指揮使領義成軍節度三
年發京畿丁壯數千築皇城東北隅且令有司繪洛陽
宮殿按圖脩之命重贇董其役乾德三年秋河決澶州

命重贊督丁壯數十萬塞之四年太祖郊祀以爲儀仗
都部署時有譖重贊私取親兵爲腹心者太祖怒欲誅
之趙普諫曰親兵陛下必不自將須擇人付之若重贊
以讒誅卽人人懼罪誰復爲陛下將親兵者太祖納其
言重贊得不誅後聞普嘗救已卽詣普謝普拒不見五
年二月出爲彰德軍節度開寶二年太祖征太原過其
郡重贊迎謁於王橋頓召赴燕飲帝曰契丹知我是行
必率衆來援彼意鎮定無備必由此路入卿爲我領兵
倍道兼行出其不意破之必矣乃命爲北面都部署重
贊令軍士銜枚夜發果遇契丹兵于定州見重贊旗幟
大駭欲引去重贊乘之大破其衆獲馬數百匹太祖大
喜優詔褒美七年卒贈侍中重贊信奉釋氏在安陽六
七年課民採木爲寺郡內苦之子崇訓崇業重贊與張
光翰趙彥徽分領諸軍節度嘉其翊戴功也光翰後唐
山南節度使虔釗兄子及卒贈侍中彥徽真定安喜人
與太祖同事世宗太祖凡事之及卒贈侍中
崇訓字知禮乾德中以蔭補供奉官遷西京作坊副使
出爲澶州河南北都巡檢使從太宗征河東還以貝冀
等州都巡檢使權知麟州雍熙中李繼遷寇夏州崇訓
領兵赴援大敗之徙監夏州軍歷知越泉登莫四州徙

知威虜軍改如京使咸平初出知石州屬繼遷犯境崇
訓追襲之至賀蘭山而還二年再知麟州又敗繼遷於
城下崇訓由河西徙閩越再移北邊凡二十五年以勞
擢西上閣門使邠寧環慶清遠軍都巡檢使徙鎮定高
陽關行營鈐轄屯鎮州兼河北都轉運使事契丹兵至
方順河將寇威虜軍崇訓陳兵唐河折其要路敵遣別
騎寇赤埃驛崇訓分兵擒戮之既而值霖雨敵兵饑乏
不敢進遂遁去移并代鈐轄權知并州從部署張進領
兵由土門會大將王超襲破契丹于定州六年授四方
館使樞密都承旨又命爲鎮定高陽馬步軍都鈐轄屯

定州景德初契丹入寇至唐河崇訓陳兵河南翌日又
與王超追襲至鎮州旣而都部署桑贊逗留不進崇訓
帥兵獨往時車駕幸澶州召崇訓乃還三年春拜檢校
太傅大中祥符二年授右龍武軍大將軍領詔防禦使
以本官分司西京卒年五十六崇訓爲人長厚謙畏未
嘗忤物子允恭禮賓副使有謀略好學人以爲能世其
家云

崇業字繼源以蔭補供奉官選尚秦王廷美女雲陽公
主授左監門衛將軍駙馬都尉廷美得罪降爲右千牛
衛率府率分司西京俄削秩去駙馬之號從貶虜陵廷

美卒起爲靜難軍行軍司馬雍熙三年授寧州刺史公
主卒葬州境真宗初始得入朝咸平四年改左屯衛大
將軍領高州團練使追封公主爲號國長公主五年十
月卒年四十一子允升爲內殿承制閤門祗候

張令鐸棣州厭次人少以勇力隸軍伍後唐清泰中補
寧衛小校晉初改隸奉國軍漢乾祐中從周太祖平河
中以功遷奉國軍指揮使廣順初遷控鶴指揮使累遷
本軍左廂都指揮使領虔州團練使從世宗征淮南移
領虎捷左廂加常州防禦使再征壽春命與龍捷右廂
柴貴分爲京城左右廂巡檢世宗將北征命與韓通

懷德領兵先赴滄州又副韓令坤爲霸州部署率兵戍
守恭帝卽位授侍衛親軍步軍都指揮使領武信軍節
度使令鐸本名鐸以與河中張鐸同姓名故賜今名宋
初遷馬步軍都虞候領陳州節制太祖征李筠以令鐸
爲東京舊城內都巡檢建隆二年出爲鎮寧軍節度帝
爲皇弟興元尹光美娶其第三女開寶二年來朝被病
車駕臨問賜帛五千匹銀五千兩并賜其家人甚厚明
年春卒於京師年六十帝甚悲悼贈侍中令鐸性仁恕
嘗語人曰我從軍三十年大小四十餘戰多摧堅陷敵
未嘗妄殺一人及卒人多惜之子守正至內園使守恩

淳化中累至崇儀副使稍遷崇儀使領綿州刺史景德
初知原州就加西上閣門使知秦州卒錄其子奉禮郎
永安爲大理評事後至徽中丞

羅彥瓌并州太原人父全德晉沁州刺史彥瓌得補內
殿直少帝在澶州欲命使宣慰大名府時河北契丹騎
充斥遂募軍中驍勇士十人從行彥瓌備選銜枚夜發
往返如期繇是補興順指揮使開運末契丹主至汴遣
彥瓌送廐馬千匹赴幽薊彥瓌至元氏聞漢祖建號太
原以馬歸漢漢祖嘉之及入汴擢爲護聖指揮使周初
遷散員都虞候坐樞密使王浚黨出爲鄧州教練使世

宗嗣位召爲伴飲指揮使改馬步軍都軍頭從何訓收
秦鳳有功遷散指揮都虞候顯德末太祖自陳橋入歸
公署見宰相范質等未及言彥瓌挺劍而前曰我輩無
主今日須得天子質等由是降階聽命擢爲控鶴左廂
都指揮使改內外馬軍都軍頭領眉州防禦使從平澤
潞還命代趙彥徽爲侍衛步軍都指揮使領武信軍節
度建隆二年出爲彰德軍節度乾德二年改安國軍節
度與昭義軍節度李繼勳大破契丹四年春又與閣門
使田欽祚殺太原軍千餘人于靜陽禽其將鹿英等獲
馬三百匹明年移鎮華州開寶二年卒年四十七

王彥昇字光烈性殘忍多力善擊劔號王劔兒本蜀人
後唐同光中蜀平徙家洛陽初事宦官驃騎大將軍孟
漢瓊漢瓊以其趨勇言於明宗補東班承旨晉天福中
轉內殿直開運初契丹圍大名少帝幸澶淵募勇敢才
齎詔納城中彥昇與羅彥瓌應之一夕突圍而入以功
遷護聖指揮使周廣順中從向拱破太原兵虎亭南斬
敵帥王璋於陣以功遷龍捷右第九軍都虞候累轉鐵
騎右第二軍都校領合州刺史世宗征淮南從劉崇進
宋偃破金牛水砦禽僞軍校閻承旺范橫又從李重進
扞吳兵于盛唐斬二千餘級又從張永德攻瀛州下東
城改散員都指揮使太祖北征至陳橋爲衆推戴彥昇
以所部先入京遇韓通於路逐至第殺之初太祖誓軍
入京不得有秋毫犯及聞通死意甚不樂以建國之始
不及罪彥昇拜恩州團練使領鐵騎左廂都指揮使後
爲京城巡檢中夜詣王溥第溥驚悸而出旣坐乃曰此
夕巡警甚困聊就公一醉耳彥昇意在求賄溥佯不悟
置酒數行而罷翌日溥密奏其事乃出爲唐州刺史乾
德初遷申州團練使開寶二年改防州防禦使是冬又
移原州西人有犯漢法者彥昇不加刑召僚屬飲宴引
所犯以手捽斷其耳大嚼卮酒下之其人流血被體股

慄不敢動前後陷者數百人西人畏之不敢犯塞七年以病代還次乾州卒年五十八太祖以其專殺韓通終身不授節鉞

論曰石守信而下皆顯德舊臣太祖開懷信任獲其忠力一日以黃袍之喻使自解其兵柄以保其富貴以遺其子孫漢光武之於功臣豈過是哉然守信之貨殖鉅萬懷德之馳逐敗度豈非亦因以自晦者邪至於審琦之政成下蔡重贊之功宣廣陵卓乎可稱令鐸身四十餘戰未嘗妄殺可謂勇者之仁矣彥瓌於革命之日首挺劍以語范質於宋則未必功在衆先於周則其過不在人后矣王彥昇殺韓通太祖雖不加罪而終身不授節鉞是足垂訓後人矣保吉承衍咸以帝壻致位藩鎮其被驅策著戎功則保吉爲優況推功李繼隆尤爲不伐而有讓然械役名士縱意禽荒累德多矣

宋史卷二百五十一

列傳第十

開府儀同三司上柱國錄軍國重事前中書右丞相監修國史領經筵事都總裁脫脫等修
皇明朝列大夫國子監祭酒臣方從哲

承德郎右春坊右中允管國子監司業事臣黃汝良等奉

勅重校刊

韓令坤

父倫

慕容延釗

子德豐
從子德琛

符彥卿

子昭愿
昭壽

韓令坤磁州武安人父倫少以勇敢隸成德軍兵籍累
遷徐州下邳鎮將兼守禦指揮使世宗以令坤貴擢陳
州行軍司馬及令坤領陳州徙倫許州罷職復居宛丘

多以不法干郡政私酷求市利倍斂民財公私忘之項
城民武郁詣闕訴其事命殿中侍御史率汀按之倫詐
報汀云被詔赴闕汀奏之世宗怒追劾具狀法當棄市
令坤泣請於世宗遂免死流海島顯德六年爲左驍衛
中郎將遷左監門衛將軍宋初拜磁州刺史轉亳州團
練使乾德四年改本州防禦使卒令坤少隸周祖帳下
廣順初歷鐵騎散員都虞候控鶴右第一軍都校領和
州刺史世宗卽位授殿前都虞候俄賞高平之功爲龍
捷左廂都虞候領容州團練使進本廂都指揮使領泗
州防禦使征太原爲行營前軍馬軍都校未幾爲侍衛

馬軍都指揮使領定武軍節度世宗命宰相李穀將兵
征淮南俾令坤等十二將以從穀退保正陽爲吳人所
乘令坤與宣祖李重進合兵擊之大敗吳人世宗親征
聞揚州無備遣令坤及宣祖白延遇趙晁等襲之令坤
先令延遇以精騎數百遲明馳入城中不之覺令坤繼
至撫之民皆按堵南唐東都副留守馬延魯爲曾匿寺
中令坤求獲之送行在途以令坤知州事由是泰州懼
以城降時錢俶受詔攻常潤圍毗陵反爲南唐所敗南
唐乘勝遣將陸孟俊逼泰州周師不能守孟俊遂進軍
蜀岡逼揚州令坤棄其城世宗怒命太祖與張永德領

兵趨六合援之令坤聞援至復入城守與孟俊兵戰大敗之擒孟俊敗其將馬貴于楚州灣頭堰擒漣州刺史秦進崇俄命向拱爲緣江招討使以令坤副之下壽州歸朝加檢校太尉領鎮安軍節度使世宗乃復幸淮右次楚州遣令坤率兵先入揚州命權知軍府事揚州城爲吳人所毀詔發丁壯別築新城命令坤爲脩城都部署六年春命令坤以汴亳民導汴水入于蔡三月世宗將北征命率龍捷虎捷驍武兵先赴大名又副王晏爲益津關一路都部署俄爲霸州都部署率所部兵戍之

恭帝卽位加檢校太尉侍衛馬步軍都虞候冬詔防北

邊宋初移領天平軍加侍衛馬步軍都指揮使同平章事太祖親征李筠詔令坤率兵屯河陽及澤潞平還京錫宴令坤等于禮賢講武殿賜襲衣器幣鞍勒馬有差以功加兼侍中又從討李重進建隆二年改成德軍節度克北面緣邊兵馬都部署將赴鎮上於別殿置酒餞之因勗其爲治乾德六年疽發背卒年四十六太祖素服發哀于講武殿錄其子慶朝爲閑廐使慶雄爲閑廐副使令坤有才略識治道與太祖同事周室情好親密鎮常山凡七年北邊以寧聞其卒甚悼惜之初南唐遣邊鎬破湖南以馬希崇分司揚州及令坤克取之希崇

以妓楊氏獻令坤甚嬖之會擒陸孟俊將械送行在所
楊氏於簾間窺見之卽拊膺慟哭令坤怪問之楊氏曰
孟俊往年入潭州殺我家二百口惟妾爲希崇所匿得
免願甘心焉令坤以詰孟俊孟俊具狀令坤乃殺之
慕容延釗太原人父章襄州馬步軍都校領開州刺史
延釗少以勇幹聞漢祖之興也周祖爲其佐命以延釗
隸帳下周廣順初補西頭供奉官歷尚食副使鐵騎都
虞候世宗卽位爲殿前散指揮使都校領溪州刺史高
平之戰督左先鋒以功授虎捷左廂都指揮使領本州
團練使遷殿前都虞候領睦州防禦使從征淮南改龍
捷左廂都校沿江馬軍都部署歸朝復爲殿前都虞候
出爲鎮淮軍都部署顯德五年世宗在迎鑾江口聞吳
人舟數百艘泊東泔洲卽命延釗與左神武統軍宋延
偓討之延釗以驍騎由陸進延偓督舟師沿江繼進大
破之淮南平遷殿前副都指揮使領淮南節度恭帝卽
位改鎮寧軍節度克殿前副都點檢復爲北面行營馬
步軍都虞候太祖卽位延釗方握重兵屯真定帝遣使
諭旨許以便宜從事延釗與韓令坤率所部兵按治邊
境以鎮靜聞太祖嘉之加殿前都點檢同中書門下三
品避其父名故也李筠叛初命與王全斌由東路會兵

進討俄爲行營都部署知潞州行府事及平加兼侍中
詔還澶州建隆二年長春節來朝賜宅一區表解軍職
徙爲山南東道節度西南面兵馬都部署是冬大寒遣
中使賜貂裘百子氈帳四年春命師南征以延釗爲湖
南道行營前軍都部署時延釗被病詔令肩輿卽戎事
賊將汪端與衆數千擾朗州延釗擒之磔于市荆湘旣
平加檢校太尉是冬卒年五十一初延釗與太祖友善
顯德末太祖任殿前都點檢延釗爲副常兄事延釗及
卽位每遣使勞問猶以兄呼之洎寢疾御封藥以賜聞
其卒慟哭久之贈中書令追封河南郡王錄其子弟授

官者四人子德業德豐德鈞德業至衛州刺史德鈞至
尚食副使延釗弟延忠歷內殿直供奉西頭官都知至
磁州刺史延卿至虎捷軍都指揮使延卿子德琛
德豐字日新幼聰悟延釗愛之嘗曰興吾門者必此子
八歲補山南東道衙內指揮使延釗卒授如京使開寶
中從征太原領御砦南面巡檢又爲揚州都監征南唐
爲洞子都監城旣下命爲昇州都監市廛安靜澤國富
饒使者多哀聚金帛德豐獨以廉潔聞俄領蔚州刺史
太平興國二年知慶州兼邠寧都巡檢嘗破小遇族奪
名馬數十匹詔書褒諭居任九年以簡靜爲治邊鎮安

之雍熙四年使登萊閱強壯及還拜西上閣門使是冬
出爲定遠軍鈐轄命領後陣中隊別將萬騎以禦邊害
淳化二年進秩東上知邢州三年改判四方館事出知
延州時侯延廣知靈武或言其得西夏情徭強難制命
德豐代之就賜白金三千兩會建使名改爲四方館使
未幾以所部不治徙知慶州俄又改靈州兼部署穀價
湧貴德豐出私廩賑饑民全活者衆轉引進使賊入境
德豐率兵擊走獲羊馬甚衆咸平二年遷客省使知鎮
州召對便坐撫慰甚至是冬遼人南侵德豐繕兵固守
餉饋不絕詔獎之二年改滄州德豐輕財好施厚享將

士在西邊時毋留京師妻孥寓長安貧甚真宗憫之特
詔給團練使奉踰年進穎州團練使知貝瀛二州五年
卒年五十五家無餘財談者善之于惟素至殿內承制
德琛以延釗蔭補供奉官累遷內殿崇班知夔州李順
之亂賊酋張餘領衆十萬餘舟千艘來寇與順戰龍山
斬首千餘級又與白繼贊擊賊斬二萬餘悉焚其舟賊
剽開州圍雲安德琛往援之又斬百餘級累詔褒諭歷
西京作坊左藏二副使咸平二年轉崇儀副使荆湖北
路鈐轄蠻擾澧鼎境上德琛戰於北汶奪耕牛鎧甲斬
馘以歸徙峽路鈐轄未至復知夔州景德中領梧州刺

史復任峽路再遷莊宅使又爲并代鈐轄知憲州天禧
初改右監門衛大將軍

符彥卿字冠侯陳州宛丘人父存審後唐宣武軍節度
蕃漢馬步軍都總管兼中書令彥卿年十三能騎射事
莊宗於太原以謹愿稱出入卧內及長以爲親從指揮
使入汴遷散員指揮使郭從謙之亂莊宗左右皆引去
惟彥卿力戰射殺十數人俄矢集乘輿遂慟哭而去天
成三年以龍武都虞侯吉州刺史討王都于定州大破
契丹于嘉山明年克其城授耀州團練使改慶州刺史
奉詔築堡方渠北烏崙山口以招党項清泰初改易州

兼領北面騎軍賜戎服介冑戰馬嘗射獵遂城鹽臺淀
一日射麋羆狼狐兔四十二觀者神之晉天福初授同
州節度兄彥饒亦鎮滑臺俄而彥饒叛彥卿上表待罪
乞歸田里晉祖釋不問改左羽林統軍俄兼領右羽林
改鎮鄜延少帝幼與彥卿狎卽位召還出鎮河陽三城
遼人南侵詔彥卿率所部拒戰澶淵契丹騎兵數萬圍
高行周于鐵丘諸將莫敢當其鋒彥卿獨引數百騎擊
之遼人遁去行周得免又副李守真討平青州楊光遠
移鎮許州封祈國公開運二年與杜重威李守貞經略
北鄙契丹主率衆十餘萬圍晉師于陽城軍中乏水鑿

并輒壞爭絞泥吮之人馬多渴死時晉師居下風將戰
弓弩莫施彥卿謂張彥澤皇甫遇曰與其束手就擒曷
若死戰然未必死彥澤等然之遂潛兵尾其後順風擊
之契丹大敗其主乘橐駝以遁獲其器甲旗仗數萬以
歸少帝嘉之改武寧軍節度同平章事爲左右所間會
再出師河朔彥卿不預易其行伍配以羸師數千戍荆
州口及杜重威以大軍降於滹水急詔彥卿與高行周
領禁兵屯澶淵會彥澤引遼兵入汴彥卿與行周遂歸
遼遼主以陽城之敗詰彥卿彥卿對曰臣事晉王不敢
愛死今日之事死生唯命遼主笑而釋之會徐宋寇盜
蠡起遼主卽遣彥卿歸鎮行次甬橋賊魁李仁恕擁眾
數萬攻徐州彥卿領數十騎遽至城下仁恕遣其徒執
彥卿馬請隨入城俄頃彥卿子昭序自城中遣軍校陳
守習繼而出大呼賊中曰相公當爲國討賊何故自入
虎口乃助賊攻城我雖父子今爲讎敵當死戰城不可
入賊惶愧羅拜彥卿前乞免罪彥卿爲設誓乃解去漢
祖入汴彥卿自徐州來朝改鎮兗州加兼侍中乾祐中
加兼中書令封魏國公拜守太保移鎮青州及殺楊邠
輩召促赴闕下周祖卽位封淮陽王劉銖銖以其京城
第宅賜彥卿及征兗州彥卿朝行在獻馬及錦綵軍糧

萬石連被賜賚俄移鎮鄆州會召魏府王殷欲以彥卿代鎮俄遼人起兵留殷控扼故彥卿不入朝殷得罪即以彥卿爲大名尹天雄軍節度進封衛王世宗初并人擾潞州潞兵敗命彥卿領兵從磁州固鎮路壓其背及帝親征命爲行營一行都部署兼知太原行府事領步騎二萬進討初彥卿之行也世宗以并人雖敗朝廷饋運不繼未議攻擊且令觀兵城下徐圖進取及周師入境汾晉吏民望風款接皆以久罹虐政願輸軍須以資兵力世宗從之而連下數州彥卿等皆以芻糧未備欲旋軍世宗不之省乃調山東近郡輓軍食濟之及世宗

至城下命與郭從義向訓白重贊史彥超率萬騎屯所口以拒北援又下孟縣遼人駐忻北遊騎及近郊史彥超以二千騎當其鋒左右馳擊彥超死之敗遼衆二千餘遼騎遁走先鋒爲遼人所掩重傷數百人諸將論議矛盾師故不振世宗乃班師數賜彥卿繒綵鞍勒馬遣歸本鎮還京拜彥卿太傅改封魏王恭帝卽位加守太尉太祖卽位加守太師建隆四年春來朝賜襲衣玉帶宴射于金鳳園太祖七發皆中的彥卿貢名馬稱賀開寶二年六月移鳳翔節度被病肩輿赴鎮至西京上言疾亟請就醫洛陽從之假滿百日猶請其奉爲御史所

勅下留司御史臺太祖以姻舊特免推鞠止罷其節制八年六月卒年七十八喪事官給彥卿將家子勇略有謀善用兵存審之第四子軍中謂之符第四前後賞賜鉅萬悉分給帳下故士卒樂爲効死遼人自陽城之敗尤畏彥卿或馬病不飲齧必唾而呪曰此中豈有符王邪晉少主旣陷契丹德光之母問左右曰彥卿安在或對曰聞其已遣歸徐州矣德光母曰留此人中原何失策之甚其威名如此鎮大名餘十年政委牙校劉思遇思遇貪黠怙勢歛貨財公府之利多入其家彥卿不之覺時藩鎮率遣親吏受民租槩量增溢公取其餘羨而

魏郡尤甚太祖聞之遣常參官主其事由是斛量始平詔以羨餘粟賜彥卿以愧其心彥卿酷好鷹犬吏卒有過求名鷹犬以獻雖盛怒必貰之性不飲酒頗謙恭下士對賓客終日談笑不及世務不伐戰功居洛陽七八年每春月乘小駟從家僮一二遊僧寺名園優游自適周世宗宣懿皇后太宗懿德皇后皆彥卿女也自恭帝及太祖兩朝賜詔書不名子昭信昭愿昭壽昭信天雄軍衙內都指揮使領賀州刺史周顯德初卒贈檢校太保闡州防禦使

昭愿字致恭謹厚謙約頗讀書好事周廣順中以蔭補

天雄軍牙職俄領興州刺史開寶中改領恩州彥卿養疾居洛入補供奉官四年改領羅州刺史七年遷西京作坊副使俄授尚食使出護陳許蔡潁等州巡兵從征太原爲御營四面巡檢使及攻幽州命與定國軍節度宋偓率兵萬餘置砦城南師還真拜蔡州刺史知并澶二州不踰月復移并門兼副部署丁內艱起復爲本州團練使連知永興軍梓滑二州咸平初又爲天雄軍邢州二鈐轄三年以疾求歸京師詔遣中使尚醫馳傳診視旣還帝賜以名方御藥拜本州防禦使四年卒年五十七車駕臨哭贈鎮東軍節度子承煦爲左千牛衛將

軍

昭壽初補供奉官開寶七年改西京作坊副使歷遷六宅副使領蘭州刺史雍熙二年冬命與劉知信護鎮州屯兵會遣將北征又與知信爲押隊都監轉尚食使真拜光州刺史端拱二年知洪州淳化四年改定州咸平初遷鳳州團練使益州鈐轄昭壽以貴家子日事遊宴簡倨自恣常紗帽素帔衣偃息後圃不理戎務有所裁決卽令家人傳道多集錦工就解舍織織麗綺帛每有所須取給於市餘半歲方給其直又令部曲私邀取之廣糴黍稻未及成熟者亦取之悉貯寺觀中久之損敗

卽勒道釋償之縱其下凌忽軍校劔南自李順平後人心洶洶知州牛冕緩弛無政昭壽又不能御軍人皆怨憤神衛卒趙延順等八人謀欲害昭壽未敢發三年正旦中使自峨眉山還京昭壽戒馭吏具鞍馬將送之延順等悉解廐中馬韁奔逸庭下陽遂誼呼登廳執昭壽殺之并殺二僕據甲仗庫取兵器都監王澤聞之急召本軍都虞候王均率兵擒捕延順左執昭壽首右操劔彷徨無所適卒見均至卽與衆推均爲帥合驍猛威武兵爲亂牛冕洎轉運使張適奔漢州是秋官兵討平之

兇雷有終傳昭壽子承諒娶齊王女嘉興縣主至內殿

不制

論曰五季之亂內則權臣擅命外則藩鎮握兵宋興內外廓清若天去其疾或納節以備宿衛或請老以奉朝請雖太祖善御諸臣知機要亦否極而泰之象也彥卿一門二后累朝襲寵有謀善戰聲振殊俗與時進退其名將之賢者歟令坤延釗素與太祖親善平荆湘則南服底定鎮常山則北邊載寧未嘗恃舊與功以啓嫌隙創業君臣有過人者類如是夫

